

KUTANGA YA MANIMA-NIMA



Matondo na nge, Mpangi Neville. Mfumu sakumuna nge.

Ya ke vwandaka ntangu nyonso mwa nswalu. Mu me kuma kaka. Mpangi Moore solulaka na munu na allo-allo yina lombaka munu na kukwisa kuna samu na jubilé ya bawu ya Pentecote ya bamvula makumi tanu. Mu vwandaka meka na kutula bilumbu na Bantu ya Mumbongo kuna na kisika yankaka, mpe mu tubaka . . . mu balulaka allo-allo, mu tubaka, “Nge ke kuwa yayi ‘Kwikila kaka’? Nge zaba yina ya zola kutuba.” Mpe mu pesaka yandi na Billy, mpe mu basikaka na mbangu. Na yawu mu—mu zaba ve mutindu bawu ke vutuka kuna, kasi ya kele . . . Kieleka mu ke zola kukwenda kuna na Louisiane, kuna, na bantu yayi, na bantu yayi ya mbote ya Sude kuna. Kasi na yina mu fwana vwanda na bilumbu yina mosi na—na Floride, na lukutakanu ya kizunga ya Bantu ya Mumbongo, mpe ya ke salaka yawu mutindu mwa mpasi ntangu beno ke meka na kuvukisa yawu kaka kintwadi na mwa ntangu fyoti mutindu yina.

² Beto nyonso kele na kyese na kuvwanda awa na suka yayi, mpe kuvwanda ya moyo mpe—mpe na kati-kati ya bayina lendaka tuba “Amen.” Ya kele kieleka. Ntangu yayi, beno lemvokila munu samu ti beto nyonso kele ya kukangama na kati awa. Mpe yandi tubaka ti bantu yankaka me kwiza mpe me kwenda kaka na matoma. Kasi beto kele . . . Ya kele kaka ya kulutula mbote yina beto lenda sala na—na ntangu yina. Beno zaba. Beno me bakula, mu me ndima yawu. [Mpangi Branham me kosula—Mu.] Beno lemvokila munu.

Beno lenda kuwa mbote na *yayi* to na ngaanda ya *yayi*? Yandi *yayi* awa? Mbote, beno nata kaka yawu awa samu mu me kuma pene-pene. [Mpangi Neville me tuba, “*Yayi* kele moyo. *Ya kele—ya kele* micro yina ke kangaka ndinga.”—Mu.] *Yayi*, ke na kubakaka ndinga awa. Mbote mingi. Mbote mingi, tata.

³ Mbote, beno me sepela mazono na nkokila? Mu . . . kieleka beto me kuzwa yawu, mpe Mfumu sakumunaka beto. Kaka bima mingi lendaka tubama samu na Nsangu kuna, kasi mu banzaka ti mbala yankaka beno lendaka longuka yawu, beno zaba, mpe beno ke bakula, mpe na kati-kati ya banzila, ngunga yina beto ke na kuzinga. Beto me kuma kaka na ntangu ya nsuka. Mpe mu ke kwikila yawu. Ya kieleka, muntu nionso banzaka yawu, mu banza, kubanda Yesu silaka na kuvutuka. Kasi, beno zaba, mosi ya bilumbu yayi Yandi ke kwiza, na mutindu nyonso, beno me mona. Na yawu mu ke mona kaka kima mosi ve me bikana, kaka enlevement ya Dibuundu.

⁴ Ntangu yayi, kaka ntete beto belama na Nsangu mu zola na suka yayi, na zulu ya dilongi ya *Kutanga ya manima-nima*.

Mpe ntangu yayi beto. . . mpe na nkokila yayi, beno bambuka moyo na lukutakanu ya nkokila yayi ntangu yayi, kele *Kuzinga Na Mvrandulu Ya Yandi*. Beno me mona? Mpe beto ke meka na kusala nswalu, na nswalu, samu ti beno kwenda ntama samu ti beto kwenda kusala dyaka samu na Kilumbu ya ntete na suka. Mpe beto ke vutula matondo samu na beno nionso. Mu zaba ve yina beto ke sala, yina mu ke sala kukondwa beno. Mu lendaka kaka—mu lendaka kaka ve kulandila kukondwa beno.

⁵ Mpe mu zola kuvutula matondo na Mpangi-kento Williams, mu banza ti mu zaba ve kento yayi. Ntangu mu kumaka na suka yayi, oh, Mpangi Charlie Cox vwandaka kuna, mpe—mpe na ntuala ya kielo beto bikaka nionso ya kifuluka na bima, babwati ya sadini mpe bima. Mwa kento yayi ya mputu me kuzwa mpasi mingi na été yayi, samu na kutula bima yayi nionso na kati ya babwati, ba-tomate mpe bima ya kudya. Ntangu yayi, yina zola kutuba mingi samu na munu. Mpe Mpangi-kento Williams, mu ke kwikila ti ba bikaka Biblia ya nge kuna samu ba sambila yawu, ba tubaka na kusambila ti Nzambi ke. . . Mu sambilaka na suka yayi na kivinga ntangu mu vwandaka longuka Nsangu, ti Nzambi ke baka yina kele na kati ya Biblia yina mpe ke tula yawu na kati ya ntima ya beno. Mpe mu ke sambila ti Nzambi ke sakumuna beno. Mu ke zola kufuta nge samu na yawu, mpangi ya kento, mu zaba ti nge me luta na kati ya bima mingi yina me sala ti nge kuzwa ndungutila mutindu yayi. Mpe mu ke tonda nge mingi! Ya kele fyoti mingi na kutuba, kasi beno bika mu pesa beno Masonuku kisika beto zaba, mutindu mu tubaka mazono na nkokila, ke kubwa ve. Yesu tubaka, “Bambala nyonso yina beno me sala na mwana ya fyoti. . .” ya ke vwanda munu, beno me mona, “. . . bana ya fyoti yayi ya Munu, beno me sala yawu na Munu.” Mpe bika yawu vutuka na beno kaka mutindu ya ke vwanda kana beno pesa yawu mbala mosi na maboko ya Yandi. Nzambi sakumuna beno samu na yawu.

⁶ Matondo na beno nionso. Ntangu beno kele awa, mu ke mona ti na mosi ya kumi mpe bima yina beno ke futa, yina kele kivuvu ya beno na beto, ti ya ke kwenda samu na Kimfumu ya Nzambi. Ntangu yayi, beto kele na kizitu samu na yawu, beno me mona, mpe beto fwana pesa mvutu samu na yawu. Na yawu beto zola kutala mbote nyonso yina beto ke sala, samu ti konso mouvement kuvwanda kaka ya kulunga mutindu beto lendaka, mutindu Mfumu ya beto ke zolaka yawu, samu ti beto zaba ve wapi ntangu Yandi ke bokila beto na kupesa mvutu mpe na manima kupesa mvutu samu na bima nionso me kwisa na nzila ya beto.

⁷ Ya kele samu na yina mu banza Paul, mazono na nkokila, yandi vwandaka kaka na kazaka mosi. Beno me mona? Yandi zolaka kuzwa ya kulutila, kasi yandi salaka yawu ve. Ya kele kaka kazaka mosi yina yandi lendaka sadila na ntangu mosi, na yina yandi bumbaka mosi yina kaka. Mu banza ve ti yandi

kipaka bimvwama ya yinza. Mu banza ve ti yandi kipaka kuzabana mingi, beno zaba yina mu zola kutuba, bantu nionso na kati ya ba-mouvement ya bawu ya misambidi ya nene mutindu ya kele bubu yayi. Mpe bantu mingi. . .

⁸ Mu zaba ti ba ke na kubaka yawu na bande. Mpe ntangu mu ke tuba bima awa, mu me bakula ti mu ke na kuzonzila kaka ve na dibuundu yayi, kasi na yinza ya muvimba. Mpe mu. . . Samu ba-bande yayi ke kwenda na mingi, bayinsi mingi, mpe ba ke nata yawu na makanda na Afrika, kuna, mpe kuvwanda kuna, mpe longi ke bakaka yawu mpe ke tendula ba-bande yina na bantu, kuna na manima kisika bawu zaba ve yina kele diboko ya kibakala mpe diboko ya kikento. Beno me mona? Kuna na Australie mpe kuna kisika bantu kele—kele, ve. . . Kima kaka bawu ke kudya kele. . . Mutindu ya bawu ya kuzwa sukadi kele kubaka mwa kipusu mosi mpe kutimuna mwa kinkuku ya baniama mpe kuvusa bawu mukongo na meno mitindu yayi. Ya kele mutindu bawu vwandaka zinga na sukadi. Mpe bawu kele ve na bilele, bawu kele na kima mosi ve. Bawu ke baka kangourou ya ntama mpe ba ke losa yandi na zulu ya tiya, bima ya kati ya kivumu ya yandi, bifundu mpe nionso, mpe ke yoka yawu fyoti mpe na manima kudya yawu. Mpe ya kele yina, ya kele mpasi. Mpe beno bambuka moyo, ba-bande yayi ba ke bulaka yawu kuna. Nsangu beno ke na kuwaka awa ba ke vutukilaka yawu kuna, na nzila ya bankama ya ba-missionnaire ke bakaka ba-bande yayi mpe ke vutukilaka yawu kuna, mpe ke tendula Yawu na bantu. Na yawu, beno me mona, ntangu mu ke kuma kuna na Kilumbu ya Lufundusu, beno me mona yina ke vwanda na zulu ya mapeka ya munu? Yinki ke salama kana mu twadisaka muntu mosi na nzila ya yimbi? Beno me mona? Beno bawu yayi. Beno banza kaka na mosi ya myoyo yango, kana mu twadisaka bawu na kima ya yimbi.

⁹ Na yina mu kele awa bampangi ya munu na ba-organisation yayi. Mpe mingi ya bawu kele bantu ya mbote, mingi ya bawu, mu kele na kyese na yawu. Kasi bayankaka na kati ya bawu kumaka mutindu yina. . . mpe na bambala mingi bantwadisi ke kumaka na kisika yina bawu fwana kangama kaka mpe kusala yawu mutindu, oh, mutindu dyambu ya politiki. Ba ke sala politiki na kati ya yawu. Mpe, na yina, bawu ke kwenda ntama na Ndinga ya Nzambi.

¹⁰ Mpe mu fwana bikana kaka na zulu ya Ndinga. Mu—mu fwana bikana kuna. Mpe ya fwana kwiza kaka na yayi. Mpe mu—mu—mu fwana tambula kaka na yawu, kaka yina. Na yina, mpe beto kele. . . Beno zaba, beto vwandaka yimba mwa nkunga mosi, “Bitembo ya ntangu ke na kunataka beto, kasi beto ke vwanda ve awa samu na ntangu ya yinda.” Beno me kuwaka yawu. “Matuti ya mpimpa ya bitembo ke soba na kilumbu ya nsemo.” Ya kele kieleka. “Beto nionso kubaka kikesa, samu beto me bikana ve beto mosi.” Ya kieleka. “Bwatu ya Lusalusu ke

kwisa ntama mingi ve samu na kuvukisa Mayaka ya ntalu na Yinzo.” Ya kele ntangu yina mu ke vingila kuna kuzwa kazaka yina ke beba ata mbala mosi ve, ya kele yawu, ya Seko. Mpe mu fwana vwanda ya kukwikama na Nzambi, na kusalaka bukebi ve na bima yina kele awa na zulu ya ntoto, tii kuna beto ke kuma kuna. Mpe kuna beto ke . . . ya kele bayina ke kwenda na nsuka.

¹¹ Na yina mu, na kati ya bamvula makumi tatu yayi. . . kaka bamvula makumi tatu na zole ya ministele, mu mekaka na kubikana na Ndinga. Mu zaba ve kima yina mu me vutukaka samu na kusoba, samu ti mu tangaka kaka yawu na Biblia, mu tubaka kaka yina Biblia me tuba, mpe ti ya kwenda mutindu yina. Mpe na yina mu me vutukilaka ve to mu me yidikaka ve kima mosi, samu mu me salaka kaka yina Biblia ke tuba. Mpe, mu me mona ti, kana Nzambi me zonza kima mosi, na yina beto fwana kwenda na Ndinga yina samu na kulungisa Yawu. Beto monaka yawu, mutindu mu tubaka na beno mazono na nkokila, na vision ntama mingi ve, beno me mona, ti ya . . . Mu zolaka vwanda kuna, mpe na kuzabisaka na ntuala na kuvwanda kuna, mpe tubaka na munu bangonda sambanu na ntuala kuvwanda na kisika yina, mpe kutelama kuna mpe kutuba, “Kwenda kuna” (bambala tatu) “na bawu.” Mpe mu landilaka kaka na bantu yankaka. Mpe vision lutaka kaka kieleka, kitini ya Nzambi, mpe mu bikanaka ya kutelama. Na yawu beto zola kubambuka moyo, beno fwana kubikana na zulu ya Ndinga, beno bikana kaka na Ndinga. Mpe kisika Ndinga ke twadisa, beno ke kwenda kaka na Ndinga, mpe Yawu ke basisa beno mbote mingi, mu ke kwikila.

¹² Ntangu yayi, mu zaba ti beno me vwanda awa kubanda ngunga ya nana, mpe ya lenda vwanda mu banza ngunga kumi na ntangu yayi. Ya kele. Na yawu beto sambila ntangu yayi na Mfumu ya beto. Ya kele na balombilu ya kuswaswana? Mu ke mona bamuswale mingi ba me tanda awa. Beno telemisa maboko ya beno samu na balombilu. Nzambi sakumuna beno. Ntangu yayi Yandi. . . Mu me zaba Yandi kubanda ntama samu na kuzaba yayi, ti Yandi ke mona konso diboko mpe zaba konso ntima, mpe kima mosi kaka me bikana na kusala kele kaka kuyufula Yandi. Mpe beno ke kwikila yawu, mpe ya ke salama. Ntangu yayi, beno ke kwikila mutindu beto ke sambila.

¹³ Tata ya Mazulu, beto me belama ntangu yayi na Kiti ya kimfumu ya nene ya Nzambi, mutindu bantu yina ke kufwa na nzutu ya kimuntu, kasi bandinga ya beto ke tuba bandinga yina ke kwisa na Kiti ya kimfumu yina ya nene kisika mosi na bitezo yankaka kisika Nzambi ke vwandaka. Samu ti, Yesu tubaka, “Beno lomba na Tata kima nyonso na Nkumbu ya Munu, Mu ke sala yawu.” Mpe Yandi lombaka beto na kusala ntembe ve, kasi, ntangu beto ke sambila, samu na kukwikila ti beto me kuzwa yina beto me lomba, mpe ya ke pesama na beto. Yandi tubaka, “Ata mpe beno lendaka tuba na mongo yayi, ‘Katuka awa,’ mpe kusala ntembe ve na kati ya ntima ya beno, kasi beno kwikila ti

yina beno me tuba ke salama, mpe beno lenda kuzwa yina beno me tuba.” Tata, beto zaba ti ya kele kieleka mingi. Beto ke tala yawu mbote kilumbu na manima ya kilumbu, mpe ya kele ve na foti na Ndinga ya Nge. Ya kele samu ti beto lenda vwanda ve na kisika yina, bantangu yankaka lukwikilu ya beto ke nata beto ve kuna na zulu, beto ke dasuka mpe ke tula ntembe. Kasi, na suka yayi, beto ke meka na kukwisa, Mfumu, na kivuvu ya malu-malu, ya kukangama na nsinga ya luzingu ya Klisto mpe nsilulu ya Yandi. Mpe beto ke kota na Mvwandulu ya Nzambi na Nkumbu ya Yesu.

¹⁴ Mfumu, mu ke kwikila ti Nge zaba balombilu nionso yina me zabana na yisi ya diboko na suka yayi yina ba me telemisa. Mu me telemisa mpe ya munu, mpe ya ke vwandaka ntangu nionso na Nge, Mfumu, samu mu kele muntu na nsatu. Mpe mu ke sambila ti Nge ke pesa mvutu na konso lombilu. Tala na zulu ya bawu, Mfumu, mpe pesa mvutu na balombilu ya bawu, kubanda buntwenya tii na kuluntu, kubanda na lombilu ya kulutila fioti na lombilu ya kulutila mfunu. Na yina, Tata, pesa bawu mvutu, bawu nionso. Mu ke lomba yawu na Nkumbu ya Yesu. Na yina bambuka moyo na munu, Mfumu.

¹⁵ Mpe mu ke sambila mpe ke tonda Nge samu na kupesa beto kupema ya mbote na kati ya banzutu ya beto, mpe samu na luzabu yina kele na beto na Ndinga ya Nge, mpe lubakusu yina beto me kuzwa na Mpeve, mpe ntangu nyonso ke sambila ti Nge ke pesa beto lubakusu ya kulutila nene samu ti beto vwanda ve bantu ya mpamba, ya lunangu na yawu, kasi bantu ya kukikulumususa, samu na kusungika ti Mpeve-Santu lenda sadila beto na kulungisa Ndinga ya Nzambi, mpe kutula beto na kisika wapi beto fwana vwanda na ngunga yayi. Samu ti beto fwana vwanda na kisika ya mbote samu ti yawu kusalama. Mpe beto zola kuvwanda, Mfumu. Kana ya kele kento ya yinzo na manima ya mesa, kana ya kele samu na bakala ya kompani yina na fungula ya molette na diboko ya yandi, mpe kimbangi, kana ya kele samu na longi na chaire, to diacre to administrateur, to samu na mwana na lukolo, bantwenia na kati ya masolo na kalasi, kisika nionso ya kele, Mfumu, bika beto vwanda kuna na ntangu ya mbote. Samu ti beto zaba ti Nge silaka yawu, mpe ya ke salama samu ti Nge tubaka yawu, mpe, na yina, ya kele lukwikilu ya beto kele ya kutunga kuna.

¹⁶ Ntangu yayi, Mfumu, beto ke kuwa ti beto me bikana na ntangu mingi ve. Ntangu yango ke na kukwisaka. Beto lenda kuwa lubungi kuna na ngaanda, mutindu ya ke na kukwendaka. Beto zaba ti lufundusu mpe nganzi ya Nzambi me kubama na kubwa. Beto lenda kuwa bisalu ya yawu dezia. Mpe beto ke sambila, Mfumu, ti Nge ke sadisa beto.

¹⁷ Mpe ntangu yayi sadisa munu, Mfumu, na zulu ya Nsangu yayi ya fioti na suka yayi, pene ya baminuti makumi tatu, yina

ba me bokila *Kutanga ya manima-nima*. Sadisa beto, Mfumu, na kubakula kaka kisika beto kele.

¹⁸ Mpe santisa beto ntangu yayi, Mfumu, katula masumu ya beto mpe bayimbi ya beto. Mpe bika ti ya vwanda ve na muntu mosi awa na suka yayi, yina me zimbana, bika ti konso muntu kuvwanda ya kukubama, kuvwanda na selekele yina ya nene ntangu beto ke kutana na simu yina yankaka. Ntangu ba ke bokila bankumbu, bika mu kuwa nkumbu na manima ya nkumbu, “munu yayi.” Yawu yina beto ke sosa, Mfumu. Mpe kiboba ke vwanda ntwenia kuna ntangu nyonso, ya ke soba na mwa ntangu fioti, yina ke kufwaka ve, ke telama na mutindu ya Yandi, mwini mpe bambwetete ke sema, mutindu Daniel tubaka, “Bayina ke nata bantu mingi na ludedomo ke sema mutindu bambwetete ntangu nyonso.” Kasi beto ke kuwa yina Nge tubaka na profete, “Kwenda nzila ya nge, Daniel, samu nge ke pema na kati ya difwa ya nge, kasi na kilumbu yina nge ke telema.”

¹⁹ O Nzambi, ti ba tanga beto ya kulunga na nzila ya Menga ya Yesu, ata makuki ya beto mosi ve beto ke tubaka, kasi na nzila ya makuki ya Yandi ti beto vwanda ya kulunga na kutelama na kilumbu yina mutindu beto ke funguna bayimbi ya beto mpe beto ke zola kutelama na kati ya ludedomo ya Yandi, na profete ya nene Daniel mpe bayina nionso ke telama ntangu ba ke pesa misendo. Tii kuna, Mfumu, sala beto bisadilu na kati ya diboko ya Nge. sala makutu ya beto bisadilu na suka yayi ya kuwa Ndinga. Sala bikoba ya munu bisadilu samu na kutuba Yawu. Samu beto me lomba yawu na Nkumbu ya Yesu, mpe bika lubakusu ya beto kubakula luzolo ya Nzambi. Amen.

²⁰ Ya kele mpasi mingi na kubanda. Ya ke talana mutindu ti ya kele na mingi yina beno lenda tuba mpe—mpe zola kutuba, mpe ya ke monana mutindu ti ya kele na mwa ntangu fyoti ya kutuba yawu. Mu banza ntete mu—mu kwenda. Mu tubaka mazono na nkokila, beto lenda kuzwa siansi ya ku—ku mu banza kutanga mosi ya Babuku ya Biblia, automne yayi to hiver, ntete beto kwenda. Mu ke kwenda, mu zola kwenda na bayinsi ya nzenza, kana Mfumu kuzola, kaka na manima ya Nowele ntangu yankaka.

²¹ Ntangu yayi mu zola ti beno baka na suka yayi samu na kutanga, na Hébreux kapu ya 11. Mpe ntangu yayi beno kuwa mbote-mbote na kutanga. Mu zola ku—kutelama na nzila ya 3.

Ntangu yayi lukwikilu kele kivuvu ya bima yina ba ke vibidilaka, nzikisa ya bima yina ba ke monaka ve.

Samu ti na nzila ya yawu bakuluntu kuzwaka kimbangi ya mbote.

Na nzila ya lukwikilu beto ke bakula ti bayinza salamaka na nzila ya Ndinga ya Nzambi, samu ti bima yina ke monikaka ve na nzila ya bima yina ke monikaka.

²² Ntangu yayi, yina kele mutindu ya dilongi ya ngitukulu samu na dilongi yina mu—mu zola kusadila. Bima salamaka ve na bima yina ke monikaka. Ntangu yayi mu zola sadila dilongi yayi na suka yayi, *Kutanga ya manima-nima*, samu mu ke zola kusala kifwani mosi na mutindu ya profesi. Mazono na nkokila mu zolaka kulonga mwa Masonuku; na suka yayi Nsangu ya profesi; mpe na nkokila yayi Nsangu ya kumwangisa nsangu.

²³ Ntangu yayi, bima yina salamaka na bima yina ke monikaka ve. Ntangu yayi, mu me longuka bamvula nyonso yayi ti bima nyonso yina kele ya kimuntu kele bifwanukusu ya bima ya kimpeve, nyonso yina kele na kimuntu. Mpe ntangu yayi beno bambuka moyo, ti ntangu beno ke mona kima mosi na yinza, ya ke fwanana na kima ya kimpeve. Beno me mona? Bima nyonso kele ya kusala na manima ya bima yina ke monika ve. Beno me mona, ya kimuntu kuna me lakisa kimpeve.

²⁴ Ntangu yayi, mutindu mu vwandaka longuka mwa bilumbu fioti me luta, mpe mu banza ti mu tubilaka yawu mazono na nkokila, na mwa ntangu fioti, ti mu vwandaka tanga kisika. . . to vwandaka kuwa na ladyo, na kukatukaka Canada, ya kisika yina dokotolo mosi awa na Etats-Unis salaka—salaka nsamunu mosi ti “muntu vwandaka bamvula mafuku kumi na yiya ya kusoba.” Bawu timunaka mukwa mosi kuna na Italie, na mvula 1800, kisika mosi kuna na bansungi 1800, ti mukwa yayi fwana vwanda mukwa ya muntu yina vwandaka. . . lendaka na nzila ya. . . Na yina bawu ke sala yawu, samu na kutuba wapi mutindu ntama ya vwandaka, mpe dokotolo yayi mutindu kiboba ya bakala mpe me pesa luzingu ya yandi nyonso na zulu ya kulongoka na zulu ya mukwa yayi. Mpe yandi tubaka, “Mukwa yayi kele mukwa ya muntu yina kele na bamvula mafuku kumi na yiya.”

²⁵ Ntangu yayi, wapi mutindu buzoba ya kele! Wapi mutindu muntu me losa luzingu ya yandi samu na kima mosi ve, yandi me meka na kutelemina Ndinga ya Nzambi, mpe yandi kele na kima ve kasi kaka kisika ya nsuka ya kukondwa nsuka na yawu. Mpe muntu nyonso zaba ti kana beno ke zika mukwa na ntoto, na kati ya bamvula makumi zole ti mukwa ke na kubaluka. Na kati ya bamvula nkama yina me luta, kaka na bitini ya yawu, mpe ata wapi mutindu beno ke tula yawu. Beno me mona? Mpe kuna na kati ya bamvula funda yinki mukwa yango zolaka vwanda, bamvula bankama kumi? Oh, yinki ke vwanda bambala kumi na yina, ya ke vwanda na difuku mosi? Na yina bambala kumi na yiya mafuku. Oh, la la! Ya kele kaka. . . Ya kele ve ya kulunga na kubanza na kima ya mutindu yina. Mukwa zolaka luta ve mafuku kumi na yiya ya bamvula na yisi ya mutindu nyonso. Muntu nyonso zaba yawu. Yandi lendaka baka kima yina vwandaka mutindu mukwa to kima mosi. Mpe na yina wapi mutindu mbote ba lendaka tuba ti ya vwandaka na mafuku kumi na yiya ya bamvula? Beno me mona? Na manima

ya nyonso, Nzambi salaka muntu na zulu ya ntoto bamvula mafunda sambanu me luta, mpe yina ke sukisa dyambu.

²⁶ Muntu mosi vwandaka solula na munu mwa ntangu fioti me luta, na mosi ya balukutakanu ya munu. Mu vwandaka tubila kusoba ya muntu, mpe yandi tubaka ti yandi vwandaka kaka na bamvula mafunda sambanu. Mpe muntu yayi tubaka, “Mbote, Mpangi Branham, beto lenda lakisa ti yinza kele mafuku ya bamvula. Na yawu kima yina beno ke na kuzonzila, beno nyonso kele na foti.”

Mu tubaka, “Nge ke kwikila Biblia ve?”

Yandi tubaka, “Mu ke kwikila ti muntu yina sonikaka Biblia.”

²⁷ Mpe mu tubaka, “Kieleka diboko ya muntu salaka mikanda, kasi Mpeve-Santu vwandaka na manima ya diboko. Beno me mona, salaka mukanda, samu ti Biblia me tuba mutindu yina.”

²⁸ Mpe yandi tubaka, “Mbote, kuna—kuna, nge fwana ndima ti bawu kele na foti na yinza.”

Mu tubaka, “Biblia me salaka ata fioti ve yimbi, ata fioti ve.”

²⁹ Yandi tubaka, “Mbote, kana yinza,” yandi tubaka, “ya vwandaka, beno lenda mona myongo mutindu ba basisaka bawu na volcan.”

Mu tubaka, “Kasi nge kaka . . .”

Yandi tubaka, “Mpe Nzambi salaka yinza yina na kati ya bilumbu sambanu.”

³⁰ Mu tubaka, “Ntangu yayi, Biblia tubaka yawu ve. Beno banzaka kaka yawu tubaka yawu.” Mu tubaka, “Beto vutuka kaka ntangu yayi samu na kusukisa kuswana ya beno. Kapu ya lte ya Genèse, ke tuba, ‘Na mbandukulu Nzambi vangaka mazulu mpe ntoto.’ Yimeni! Bantangu yikwa Yandi vwandaka sala yawu, mu zaba ve. Yandi tubaka na beto ve. Kasi, ‘Na mbandukulu Nzambi vangaka mazulu mpe ntoto.’ Yimeni! Na yina, ‘Mpe yinza vwandaka . . .-kubasika mutindu.’” Ya kele ntangu Nzambi bandaka na kusadila yawu. Beno me mona? Na yawu bawu bulaka kaka bayintu ya bawu samu na kima mosi ve. Beno me mona? Beno me mona?

³¹ Nzambi salaka yinza. Yandi lendaka vwanda na bamvula dikiasa mosi na kusalaka yawu; mu zaba ve bantangu yikwa Yandi vwandaka, kasi Yandi salaka yawu. Mpe Yandi tubaka ve bantangu yikwa Yandi vwandaka, mpe ya kele ve kisalu ya beto bilumbu yikwa ya vwandaka. Yandi tubaka kaka, “Na mbandukulu Nzambi vangaka mazulu mpe ntoto.” Yimeni! Yina ke sukisa dyambu. Kaka yina ya kele. Bantangu yikwa Yandi vwandaka sala yawu, ya kele ve . . .Kasi na yina luvangulu bandaka na kukulumuka ntangu yayi na ntangu yankaka, ntangu Yandi bandaka.

³² Mpe mu ke kwikila, ti na kati kuna, ti nyonso na zulu ya ntoto ke lakisa Mazulu. Mu ke kwikila yawu, samu ti beno ke mona nyonso ke na kunwanaka samu na luzingu ya kele samu ti ya kele na luzingu yina yawu me talisama. Mpe mu ke kwikila ti ntangu Nzambi salaka muntu, Yandi bandaka na kutalisa bima ya fyoti mutindu luzingu ya kibulu, mpe kuna kima yankaka Yandi vangaka vwandaka kima ya kuswaswana. Ya kele kaka kieleka mutindu Biblia ke tuba ti Yandi salaka yawu. Yandi salaka ntete bayinti mpe bayinti ya bayinti, mpe Yandi salaka muntu. Mpe na yina kima ya nsuka yina me katuka na ntoto na mutindu ya luvangulu vwandaka muntu, kima mosi ve ya kulutila zulu ke kwizaka. Samu na yinki? Ya vwandaka kifwani ya kulunga ya mazulu, yina, Nzambi kele Muntu. Beno me mona? Nzambi kele Muntu, na yawu ya ke siamisa yawu. Mpe ntangu Nzambi kulumukaka samu na kuzinga na kati-kati ya beto, Yandi vwandaka Muntu. Beno me mona? Muntu, na yawu ya ke lakisa ti kulunga ya kusoba vwandaka Nzambi, yina kele Muntu.

³³ Mpe kuna beno baka yinti, (beno baka matiti mpe nyonso yankaka yina), beno baka yinti, ya ke lakisa Yinti ya Luzingu yina kele na Mazulu. Bima nyonso yayi ke na kunwanaka samu na kuvwanda ya kulunga. Mpe kima nyonso na yinza, mutindu Hébreux ke tuba awa, kusalamaka na bima yina ke monikaka ve. Bampova yankaka, bawu kele ya kulutila kimpeve. Mpe ya kulutila kimpeve ke na kulakisaka ya kimuntu. Beno me mona? Ntangu yayi, na yina yinza vwandaka ya Kukonda nsuka, to ya ke vwanda kukonda nsuka na ya kulutila kimpeve, kasi disumu bebisaka yinza. Na yawu, mpe kana ya kele mutindu yina, yina mu ke kwikila ti ya kele, na yina bima nionso ke salama na zulu ya ntoto kele kifwani ya bima ya kimpeve yina ke na kusalama. Beno me mona? Ya fwana lakisa kima mosi, kisalu ya muntu.

³⁴ Ntangu yayi, beto ke mona ti, mutindu nzutu ya kimuntu, awa kele nzutu ya kimuntu, mpe nzutu salamaka samu na kubuta yawu mosi, ya kele samu na yina bana vwandaka. Mpe ntangu yayi nzutu ya kimuntu, na mbutukulu ya kimuntu ya bébé, beto ke mona ti kima ya ntete ke basika kele maza, na manima menga, mpe na manima luzingu. Beto ke mona ti na kati ya nzutu ya kimpeve ya Klisto, kima ya ntete kele maza, mpe Menga, mpe Luzingu; kunungisama, kusantisama, mbotika ya Mpeve-Santu. Beno me mona mutindu ya ke lakisa, bima nyonso ya kimuntu ke lakisa bima ya kimpeve. Mbutukulu ya kimuntu.

³⁵ Beto baka, mutindu, makwela ya kuvukana. Beto ke mona ti, samu na makwela; beto ke mona yinzo ya lufundusu, mpe bansilulu, na manima ya kele makwela. Yina ke sukisa dyambu samu na ntangu nyonso. Ntangu yayi, ya kele kima mutindu mosi ya kele na Klisto mpe Dibuundu. Beno me mona? Yinzo ya lufundusu, Nzambi ke bokila bantima ya beto; beto ke kukipesa; nkinzi ya makwela, mpe Kento ya makwela ke baka Nkumbu ya Bakala ya makwela. Beno me mona? Beno me mona? Beno me

mona? Yawu yina, yina ke sala Kento ya makwela. Ntangu yayi, ntangu nionso kento ya makwela ke baka nkumbu ya bakala ya makwela.

³⁶ Ya kele na bima mingi yina beto lendaka zonzila awa. Mu me sonika liste mosi yina me baka munu bangunga zole samu na kumanisa yawu, na kutala, mpe Masonuku samu na kusiamisa yayi, mutindu ti beno zola ndambu ya yawu awa kusiamisa yawu. Mutindu Jean ya Ntete 5:7, ke lakisa mbutukulu ya kimuntu mpe mbutukulu ya kimpeve, mpe nyonso yankaka, “maza, Menga, mpe Mpeve.” Mpe tatu na Mazulu, “Tata, Mwana, mpe Mpeve-Santu,” tatu yayi kele mosi. Ya kele na tatu yina ke wisanaka na ntoto, bawu kele ve mosi, kasi bawu ke wisanaka na kati ya mosi, na ntoto, ya kele “maza, Menga, mpe Mpeve.” Beno me mona, “maza, Menga, mpe Mpeve,” mutindu mbutukulu ya kimuntu kele kifwanikusu ya yina.

³⁷ Na yawu kana muntu me vwanda ya kukangama na zulu ya dibanza ya “kaka kunungisama kele nyonso yina beno fwana kuzwa,” yandi kele na foti, na yimbi. Yandi fwana vwanda na yimbi. Mpe na yina kana dibuundu bayina ke kwikila mutindu ba-Pentecotiste mingi, ti Mpeve-Santu kele yawu, “kaka yina, beno balula bantima mpe beno kuzwa Mpeve-Santu,” ya kele dyaka yimbi, samu ti beno fwana kuzwa kusantisama na kati kuna samu na kusukula yawu na ntwala Mpeve-Santu kukota. Kana ve, beno bika Menga na lweka. Beno me mona? Mpe Mbutukulu ya malu-malu, mutindu bantu ke zonzaka ti mbotika ya Mpeve-Santu kele Mbutukulu ya malu-malu. Ntangu yayi, ya kele luvunu. Mbotika ya Mpeve-Santu kele ya kuswaswana na Mbutukulu ya malu-malu. Mbutukulu ya malu-malu kele ntangu beno me butuka mbala zole. Kasi Mpeve-Santu kele ntangu ngolo ke kota na Mbutukulu yina samu na kisalu. Ya kele kieleka. Beno me mona? Mpeve-Santu kele. . . ya kubotama na kati ya Mpeve-Santu.

³⁸ Mbutukulu ya malu-malu, beno kele na Mbutukulu ya malu-malu na nzila ya kuvwanda na kukwikilaka na Mfumu Yesu Klisto. Beno me mona? Na nzila ya kuvwandaka na lukwikilu mpe na kundimaka Yandi mutindu Mvulusi ya beno, yina kele Mbutukulu, beno me mona, samu ti beno me luta lufwa na Luzingu. Ntangu yayi, kana beno zola kuvutukila yawu, beno baka Santu Jean 5:24, “Yandi yina ke kuwa Bandinga ya Munu mpe ke kwikila na Yandi yina fidisaka Munu, kele na Luzingu ya kukonda nsuka.” Beno me mona, yandi kele na Luzingu samu ti yandi ke kwikilaka. Mpe kimvuka yina mosi zolaka kwenda na Pentecote samu na kubotama na Mpeve-Santu. Kieleka.

³⁹ Mpeve-Santu kele ngolo ya kisalu. Na yawu ntangu beno ke zonzila beno fwana butama dyaka, mpe kutula yawu na Mpeve-Santu, mingi ya ba-Méthodiste mpe nyonso yankaka kele na foti kuna. Ya lenda ve. Ya ke tambula kaka ve na nzila ya Masonuku awa. Beno ke kuzwa kima na lweka yankaka. Ya fwana baka

yawu mutindu Masonuku me tula yawu awa. Beno me mona? Mpe Mpeve-Santu kele. . . “Beno ke kuzwa Mbutukulu ya malu-malu na manima ya yayi”? Yinki? Ve. “Beno ke kuzwa ngolo,” Actes 1:8, “na manima ya yayi Mpeve-Santu me kwiza na zulu ya beno.” Beno me mona? Mpe bawu kwikilaka yimeni na Luzingu ya Kukonda nsuka, mpe nyonso yina, kasi bawu zolaka kuzwa Mpeve-Santu samu na ngolo. “Beno ke vwanda bambangi samu na Munu na manima Mpeve-Santu me kwisa na zulu ya beno,” samu ti Mpeve-Santu kele mbangi ya mvumbukulu, na kulakisaka ti beno me kuma kuluntu na Klisto.

⁴⁰ Ntangu yayi, kimuntu. Bima nionso ya kimpeve, bima nionso ke na kusalamaka mpe nionso ke salama, to ke talisaka bima ya kulutila kimpeve, to yinza kele kifwanikusu ya bima ya kulutila kimpeve.

⁴¹ Ntangu yayi, mu kwendaka kuna na Kutalisama ya bima ya Yinza ya muvimba ntangu beto vwandaka kuna pene-pene na yawu kuna na Spokane, mpe mu banzaka ti mu ke nata dibuta ya munu.

⁴² Samu ti mu vwandaka kaka nkuna na Kutalisama ya bima ya Yinza ya muvimba ya États-Unis, mpe ya kele ntangu ya vwandaka na Chicago, bamvula me luta, Hope mpe munu kwendaka kuna. Mpe beto bikanaka ve kuna kasi beto lutisaka kaka kilumbu mosi, samu na pickpockets, mpe bima nionso. Yandi lwataka diyaka yina cousine ya munu pesaka yandi, mpe mu vwandaka tambula pene-pene ya yandi, muntu mosi bakaka yawu. Kaka . . . ya vwandaka kaka mpasi. Mpe na yawu mu . . . Beto vwandaka kilumbu mosi mpe vutukaka.

⁴³ Kasi Kutalisama ya bima ya Yinza ya muvimba, mu bakaka dibuta ya munu mpe beto kwendaka kuna. Ya vwandaka diaka mutindu mosi na Kutalisama ya Louisville pene-pene awa. Beto monaka Space Needle yina ba ke zonzilaka, ya vwandaka kima yankaka ve kasi kwendaka awa na Elsby Build- . . . , to, Brown Building, to kisika mosi kuna, mpe beno ke baka kimatinu samu na kumata bitezo pene ya nana to kumi mpe beno ke kulumuka diaka. Yawu yina. Mpe mu banza ti General Electric vwandaka yina vwandaka na yawu kuna. Kasi ya vwandaka na kima mosi yina vwandaka ya kuswaswana. Ntangu yayi, Allemagne vwandaka na ntelemanu ya bawu, Russie na bayinsi yankaka nionso vwandaka na yawu, samu ya kele Kutalisama ya bima ya Yinza ya muvimba. Bantu ya Allemagne, France, mpe mwa bantelemanu yango vwandaka nene mingi ve na kisika kulutila chaire yayi awa.

⁴⁴ Kasi bantu ya mayele vwandaka na bisalu ya bawu, mpe kima ya ngudi bawu vwandaka—bawu vwandaka kusala, vwandaka kisalu ya tabaka. Mpe kana muntu yina ke kunwaka makaya mpe ke kota kuna, mpe ke basika mpe ke kunwa makaya diaka, ya kele na kima ke tambula mbote ve na mabanza ya

muntu. Ntangu mu monaka bawu na meso ya munu mosi kubaka dikaya mpe kutula yawu na masini, mpe ba ke benda mulinga ya tabaka kuna mpe ke pusa yawu na kati ya tube yina kele na ba-produit chimique, mpe cancer ya mpembe vwandaka kaka ya kifuluka na yawu, na dikaya mosi. Mpe na yina yandi tubaka, “Bantu mingi ke tubaka,” yinza yayi ya muvimba, kisalu ya zulu mingi na zulu ya yawu, yandi tubaka, “bantu mingi ke tubaka, ‘Mu ke kumina ve mulinga ya yawu.’” Mpe muntu ya science yayi bakaka dikaya yandi mosi mpe bendaka mulinga na kati ya yinwa ya yandi, yandi fulaka mupepe ya yawu ve na nzila ya mbombo ya yandi, to kulumusaka yawu ve mutindu ba ke salaka na ba-poumon ya bawu, kasi ba ke tula kaka yawu na kati ya yinwa ya yandi mpe na manima ba ke fula mupepe ya yawu na kati ya ba-produit chimique yina mosi, ya vwandaka ve na cancer na kati ya yawu. Yandi tubaka, “Wapi kisika ya me kwenda? Na yinwa ya munu. Ntangu mu me kota, ya ke kota na estomac, kieleka.” Yandi tubaka, “Ntangu yayi . . .”

⁴⁵ Na yina dibanza kwisaka, “Samu na yinki badokotolo me tuba ti makaya ke kufwaka ve?”

⁴⁶ Yandi tubaka, “Muntu nyonso yina ke teka bukuluntu ya yandi! Dokotolo yina ke salaka nsamunu ya mutindu yina lendaka kuzwa kupema ya kisalu, samu bakompani yayi ya makaya ke pesa yandi mbongo mingi samu na kuzwa kupema ya kisalu ya yandi.” Kieleka yandi ke teka bukuluntu ya yandi, samu ti yandi zengaka ndefi ve na kusala kima mutindu yina. Kasi bawu ke salaka yawu na mutindu nyonso.

⁴⁷ Mpe yandi tubaka, “Beno tala bamasini ntangu yayi. Beto ke siamisa yawu na beno na nzila ya bisalu ya science.” Mpe bawu vwandaka na Yul Brynner, beno zaba, vedette ya cinema na kati kuna. Ti, mpe ntangu mwa kitini yina ya nicotine. . . Yandi tubaka, “Ntangu yayi bawu ke tubaka ‘bouts filtros.’” Yandi tubaka, “Muntu yina ke salaka yawu, yina ke lakisaka kaka kondisyo ya yintu ya yandi. Samu ti kana beno kele ve na mulinga, beno kele ve na goudron, mpe goudron ke salaka mulinga. Mpe kana beno kunwa dikaya ya bout filtros,” yandi tubaka, “ya fwana vwanda pene ya tatu to yiya samu na kusepelisa yina yankaka, samu ti ya fwana vwanda kaka goudron ya mingi samu na kusepelisa.” Kana beno kunwa ve mulinga, ya ke vwanda ve na goudron. Beno fwana kuzwa goudron samu na kuzwa mulinga. Ya kele mutindu yina. Yandi tubaka, “Nwa dikaya, kana nge ke kunwa yawu, nwa mosi yina kele ve na bout filtre na zulu ya yawu. Ya ke pesaka. . . Dikaya mosi ke sepelisa kisika ya ke lombaka tatu ya yina yankaka, samu na yina beno ke benda goudron fioti mingi.”

⁴⁸ Ya kele mayele ya yimbi samu na kuteka! Yinsi yayi nionso me fuluka na mayele ya yimbi samu na kuteka, mpe mvindu mpe nionso yankaka.

49 Mpe kuna yandi bakaka yawu mpe lakisaka mutindu ti mwa tiyo yina kotaka na laka to na ba-poumon. Mpe ntete ya kele mpembe, na manima ya ke baluka na rose, mpe na manima ya rose ya ke baluka na violet. Mwa bitini—mwa bitini ya fioti ya mwa cellule vwandaka nene mutindu *yayi* na nzila ya ditenzi, kasi, ya kieleka, beno ke baka ditenzi ya ngolo samu na kumona mpe cellule. Na yina yandi tubaka, “Ntangu ya ke kuma mbwaki, nge ke na cancer.” Yandi tubaka, “Muntu yina ke kunwa paket mosi ya makaya kilumbu mosi kele na makumi sambwadi na zulu ya nkama kulutila ya siansi ya lufwa na cancer kulutila muntu yina ke kunwaka yawu ve.” Mpe ya ke monana buzoba na kubaka siansi ya mutindu yina.

50 Ntangu yayi, mpe na manima yandi kuzwaka kima yankaka mpe siamisaka yawu, yandi basisaka mpuku mosi ya mpembe. Mpe yandi bakaka dikaya mosi mpe tulaka yawu na masini, mpe yandi bendaka yawu na mutindu mosi ya kima mutindu marbre ya mpembe, mpe bakaka coton-tige, mpe bakaka nicotine yina ba basisaka na dikaya mosi mpe tandaka yawu na zulu ya mukongo ya mpuku. Na manima ya konso bilumbu sambwadi bawu vwandaka basisa bampuku yankaka. Mpe ba zolaka kuzwa leso mosi na mosi ya kilumbu yina. Mpe ba losaka na kati kuna mpuku bilumbu sambwadi mpe vwandaka basisa yawu kuna, ya vwandaka *yayi* dituti ya ngolo ya cancer na zulu ya mukongo ya mpuku. Bayankaka na kati ya bawu ke zingaka ve bilumbu sambwadi. Bampuku lendaka ningana ve. Mu lendaka kudia ve bilumbu zole to tatu, samu na kutala kima yina ya nzanzi, ya kutelama kuna na cancer, mpe ya vwandaka kulumuka na makulu ya yandi mpe bima mutindu yina, cancer ya nene pene ya metele mosi na yinda basikaka na zulu ya mukongo ya mpuku yayi, ya nicotine ya dikaya mosi. Mpe beno ke banza ti yayi sukisaka bawu? Muntu mosi ya nene ya kuvwanda pene-pene ya munu kuna, mpe mutoki vwandaka basika na kizizi ya yandi, yandi tubaka, “Mutindu ya kubula, mutindu yina ve?”

Mu tubaka, “Nge ke nwaka makaya?”

Yandi tubaka, “Yinga, tata, mu ke sala yawu.”

51 Mu tubaka, “Mbote, na yina nge fwana sukisa yawu.” Kasi yawu yina, bansalulu, yina ba lenda talisa ti ya ke sala yawu.

52 Ntangu yayi, mu zabisaka na ntwala ti yinza vwandaka na ntwala mpe kana ntemuka ke zinga, kuna na ntangu ya musiku ntangu ya vwandaka kitumbu na kuteka mulangi ya wiski, ya ke vwanda kitumbu bambala kumi nene mingi samu na kuteka pake ya makaya na mwa bamvula fioti na ntangu yayi, kana ntemuka ke zinga. Ya kele bambala kumi yimbi kulutila wiski. Ya kieleka. Ya kele—ya kele muntu ke kufwaka, yina. Mpe beno lenda tuba na bantu yina me tala yawu, mpe bawu ke kipe yawu

diaka ve. “Ya kele mulongi ya exalté,” mpe ti ya kwenda. Beno me mona, kaka yina, bawu ke bakula ve.

⁵³ Kasi, dibanza ya munu kele yayi, yina bima ya science vwandaka na lenda ya kusala. Ba vwandaka kuna na Yinza ya muvimba, na kulakisaka na nzila ya kusosa ya science yina science vwandaka na kiyeka ya kusala na bima ya kimuntu. Ntangu yayi, beto kele awa na kulakisaka na nzila ya kusosa ya kimpeve yina Nzambi vwandaka na lenda ya kusala na bantu yina ke kwikila Ndinga ya Yandi. Ntangu yayi, samu na kusala bima ya science, beno fwana sala na nzila ya science. Samu na kusala bima ya kimpeve, beno fwana sala na bandonga ya kimpeve. Ntangu yayi, beno ke banza ti bampuku yina vwandaka talana ya boma, na yina ya salaka, beno zolaka mona yawu! Kana mu vwandaka na foto ya yawu, ata mpe, samu na kulakisa. Kana mu zolaka kuzwa yawu, mu zolaka, kasi ba zolaka ve kubika beno kuzwa yawu. Kasi beno tala. Ya kieleka, mpuku ke zinga kaka mwa bangunga fioti kulutila, bayankaka na kati ya bawu ke zingaka ve bilumbu sambwadi. Kasi beno banza na yawu!

⁵⁴ Beno ke banza ti ya ke talana ti cancer kudyaka yawu mingi, beno fwana kumona yinki mutindu ke talana moyo yina me manga Nsangu ya mbote. Beno fwana tala wapi mutindu ya kima ya boma bawu kele. Wapi mutindu dyabulu ke simba muntu mpe lenda bebisa mwana ya Nzambi na kati ya kima ya boma, mutindu yandi kele na meso ya Nzambi. Oh, ya lendaka vwanda bametele sambanu na yinda, mpe mapeka mutindu mu zaba ve, mpe bansuki ya kunionga mpe *yinki*, yina zola kutuba kima mosi ve. Ya kele kati ya muntu yina ke zingaka mingi. Ngaanda kele putulu, na mutindu nyonso.

⁵⁵ Na yina ya kele bisalu, mpe na manima bawu vwandaka talisa, ya vwandaka na space needle mpe nionso, yina ba vwandaka talisa mutindu bisalu, yina ba lendaka sala, mpe ba vwandaka tendula bisalu ya bawu ya ba-atome mpe nyonso yina. Bawu vwandaka talisa luzabusu na ntwala ya yina Chevrolet zolaka vwanda. Ya kele General Motors yina vwandaka talisa yawu, yina. . . na yankaka, na nsungi ya kulanda, yina Chevrolet ya nsungi ya makumi zole na zole zolaka vwanda. Ya talanaka na munu ti ya fwananaka na tiyo ya gaz na capot na zulu ya yawu. Ntangu yayi, bawu lakisaka yinki mutindu ba ke tambusa yawu mpe ke pusa tiya na ngolo na nzila ya energie atomique na mwa mutindu ya mansala yina vwandaka zanguka mosi na zulu yankaka mpe vwandaka na luyalu. Yina ke vwanda ndandu ya nene.

⁵⁶ Kasi mu ke kukiyufula kana beto lendaka vutuka na ba-page ya Buku ya Nzambi, na suka yayi, mpe kumona yina dibuundu ke talana mutindu na ntangu yina, kumona bansalulu yina Nzambi salaka. Oh, yinki mutindu bamambu ke salama ntangu nyonso na ntoto yayi ke na kumonikisaka kima mosi yina ke katukaka

kisika yankaka; kasi ntangu ya ke bula ntoto, ya kele ntangu nyonso na mutindu ya kubeba samu ti ya kele na yinza ya mudidi mpe disumu. Beno me mona? Kasi na yina ya kele na kutalisama ya kieleka na bitezo ya kimpeve ya kitezo yankaka. Na kuvwandaka na bitezo tatu, na yina kitezo ya sambanu kele na kutalisama ya yawu. Mu kele na kyese mingi samu na yawu.

⁵⁷ Ntangu yayi, beto baka kaka bansalulu ntangu yayi yina beto me kuzwa na lenda ya kusala na mwa bamvula me luta. Ntangu yayi, beto banda na zulu ya kima yina me salama. Mu ke zola ze kukanga beno ntangu ya yinda, kana Mfumu kuzola, kasi mu zola beno kumona yayi na nswalu nionso. Mpe, oh, ntangu ya kumaka na munu, mu kuwaka mutindu mu vwandaka pumbuka. Ntangu yayi beno tala, ntangu yayi, mwa bamvula fioti me luta transport vwandaka na nzila ya mpunda mpe mpusu, ntama mingi ve, ntama mingi ve. Munu mosi vwandaka tambula na ditoma ya mpunda, mpe na zulu ya kiti ya mpunda. Ntangu mu vwandaka mwana-bakala, ya bamvula kumi na tanu, kumi na sambanu, mu mataka na zulu ya mpunda, mpe mu kwendaka na mbanza na kati ya ditoma ya mpunda, na kunataka ditoma kaka na dibuundu yayi awa, na nzila ya poto-poto kuna, mpe kisika ya poto-poto mosi awa ya kifuluka na matiti ya yimbi mutindu yinzo ya nene, na kutala, na mpunda mpe pusu-pusu, mu vwandaka kutekisa madesu ya mpembe mpe bima yankaka ya bilanga.

⁵⁸ Ntangu yayi mu ke luta na ntwala awa na ditoma ya moteur ya kuvimba. Yinki luswaswanu! Kilumbu ya ditoma ya pusu, na manima kilumbu ya tomabilu.

⁵⁹ Na manima nsungi ya avion me kwisa, beto me luta na ntoto na mipepe. Ntangu yayi, kana beno tala mbote, kieleka mutindu kisalu yina vwandaka na nzila ya science, kana muntu ke kuzwa dibanza ya kimpeve mpe kubakula, ya talisaka kisalu ya ekonomi ya Nzambi na Dibundu ya Yandi. Ntangu yayi bilumbu . . .

⁶⁰ Mpe, beno bambuka moyo, munati-nsangu ke kwisaka ntangu nionso na nsuka ya Nsangu. Beto zaba na bansungi ya dibuundu kuna mutindu beto kuzwaka yawu.

⁶¹ Ntangu yayi, bilumbu ya ditoma ya mpunda vwandaka nani? Yina vwandaka nsuka ya nsungi ya ba-Lutherien. Beno me mona, bilumbu ya bampunda. Bawu kwikilaka na kunungisama. Nzambi ke nata Dibundu ya Rome, Bukatolika, Yandi me kotisa yawu na kisalu ya yawu ya ntete ya kimpeve, ti, "Muntu ya kudedama ke zinga na nzila ya lukwikilu." Yina vwandaka na bilumbu ya ditoma ya mpunda, kisika bawu lutaka na . . . na bilumbu ya ditoma ya mpunda, yina sukaka.

⁶² Ntangu yayi, kisalu ya kulanda ya muntu kuzwaka na nzila ya transport vwandaka tomabilu. Mpe, beno tala, tomabilu yina ke kuma mingi ntangu nionso, na ngolo ya yawu.

⁶³ Ntangu yayi, na nsuka ya nsungi ya Wesley, kotaka na kisalu ya kimpeve, kusantisama, yina zola kutuba ti dibuundu me zanguka kubanda na kitezo ya kunungisama tii na kitezo ya kusantisama.

⁶⁴ Ntangu yayi, mu zola ti beno bambuka moyo na yayi na yina beto ke kwenda na ntwala, ti dibuundu me bokila “dibuundu” kele Dibuundu ve. Dibuundu kele Dibuundu, ya kimpeve! Makumi ya mafunda bambala mafunda ya ba-Luthérien yina kotaka na dibuundu, zabaka mingi ve na yina me tala kunungisama kulutila ngulu zabaka kiti ya mpunda. Bawu—bawu zabaka kima mosi ve na yawu. Mpe na nsungi ya Wesley, mutindu makumi ya mafunda vwandaka tuba kusantisama, bawu zabaka mingi ve samu na kusantisa ngolo ya Nzambi kulutila—kulutila kalumbu ke salaka samu na yina me tala mapapa ya mvula-mpembe. Beno me mona, kieleka bawu zabaka yawu ve.

⁶⁵ Kasi ya vwandaka na bantu yina salaka yawu. Alleluia! Beno me mona kisika mu ke kuma. Ya vwandaka na muntu yina zabaka yina “nungisaka” yina zolaka kutuba na ntwala ya Nzambi, “na kuvwandaka na ngemba na Nzambi na nzila ya Mfumu ya beto Yesu Klisto.” Ya vwandaka na bayankaka ya ba-Luthérien yina vwandaka ya kukwikama. Bawu kwikilaka Yawu. Ata yina dibuundu ya Katolika tubaka, bawu kwikilaka Ndinga ya Nzambi mpe telamaka na zulu ya Yawu samu munatinsangu ya nsungi yina longaka “muntu ya kudedama ke zinga na nzila ya lukwikilu,” mpe bawu kwikilaka na nkadulu ya kunungisama. Mpe bawu vwandaka na lenda na nzila ya lemvo ya Nzambi na kusala kunungisama, kuvwanda na ngemba na Nzambi na nzila ya Mfumu ya beto Yesu Klisto.

⁶⁶ Ntangu yayi, beto ke tala dyaka, na manima kwizaka ba-Méthodiste na kusantisama. Ya vwandaka na mingi ya ba-Méthodiste yango vwandaka kieleka ya kusantisama. Ntangu yayi, ya kele na mingi ya bawu yina tubaka yawu mpe zaba kima mosi ve samu na yawu. Dibuundu ya ba-Methodiste longaka kusantisama. Bawu tubaka ti bawu fukamaka mpe dilaka mpe vutukaka, bawu tubaka, “Nkembo na Nzambi, mu me santisama!” Mpe bawu landilaka kaka na kuzinga mutindu bawu vwandaka sala ntangu nyonso. Kasi bayankaka ya babakala yina mpe bakento vwandaka kieleka ya kusantisama na bima ya yinza, mpe kuzinga luzingu ya busantu, yina ba me tula na lweka. Samu na yinki? Ya vwandaka nsungi ya tomabilu yina kuzwaka ngolo ya kulutila ya bachevaux-vapeur. Tomabilu, Model T ya ntama vwandaka kaka na ngolo ya kumi na tanu to kumi na zole ya ba-chevaux. Beno me mona, ya vwandaka na ngolo kumi na tanu to makumi zole ya ba-chevaux ya kukangama na mwa moteur mutindu yina. Kusantisama! Ntangu science salaka kima na—na—na nzila ya kimuntu, Nzambi ke sala kima mosi na nzila ya kimpeve. Beno

me mona, kima mosi ke salama ntangu nionso. Mpe na manima nsungi ya kusantisama . . .

⁶⁷ Ntangu yayi, beto baka bakala mutindu kiboba Bevington. Bakala, yina zolaka vwanda bakala ya nene kulutila kiboba ya Mpangi Bevington? Mpe beno tala John Wesley, George Whitefield, Finney, Knox, mingi ya ba-Methodiste ya ntama yina lutaka na ntangu mosi ya mpasi. Bawu lutaka na difelo na zulu ya ntoto, nkwasusu, samu ti bawu kwikilaka ti Ndinga ya Nzambi longaka kusantisama, etapi ya zole ya lemvo, mpe bawu bikanaka na yawu, mpe bawu kwikilaka yawu, mpe bawu salaka mambu ya ngitukulu na nzila ya yawu. Kaka mutindu mosi na Henry Ford mpe bantu yankaka salaka na transport ya model-T Ford ya ntama kana beto ke fwanikisa na yina vwandaka mpunda, yandi kwendaka na ntwala kulutila tii na kilumbu ya mpunda. Mpe Wesley kwendaka na ntwala na zulu ya kilumbu ya Luther.

⁶⁸ Mpe na manima kwisaka Pentecote. Mpe mutindu science ya yinza vwandaka na lenda ya kusala moteur ya tomabilu, Wright Brothers yina ba vangaka to yina ba salaka, yina ba yidikaka, mu zola tuba, mpepo, masini yayi ke pumbuka vwandaka ntama mingi na zulu kulutila ditoma na zulu ya ntoto, samu yawu zangukaka na mipepe. Ntangu yayi, Bampangi ya Wright, na nzila ya bisalu ya bawu, vwandaka na lenda ya kubaka science mpe kuyidika kima mosi awa na zulu ya ntoto, samu na kulakisa ti ya vwandaka na kima mosi ya nene ya kimpeve yina vwandaka kubama na kusalama. Mpe ntangu Bampangi ya Wright vwandaka na lenda ya kusala ti muntu kukatuka na zulu ya ntoto, Pentecote kubwaka mpe mataka na mupepe na dikabu ya kimpeve, na mbotika ya Mpeve-Santu. Yandi mataka na mupepe! Oh, alleluia! Yandi katulaka makulu ya yandi na ntoto samu yandi lendaka—yandi lendaka pumbuka, mataka na zulu! Oh, wapi mutindu ntama yandi vwandaka na zulu ya ditoma ya mpunda! Wapi mutindu ntama yandi vwandaka na zulu ya tomabilu! Yandi vwandaka na mipepe. Yandi vwandaka bula mpe vwandaka fula mpe vwandaka bula ngolo, kasi yandi vwandaka pumbuka. Beno me mona, yina muntu ke sala na zulu ya ntoto, samu ti ba me sala bima yina ke monika ve. Nzambi vwandaka na kiyeka ya kusala kima mosi na nzila ya bantu ya kufuluka na Mpeve yina vwandaka na nzala mpe mpwila, mpe bayina ke bikana na Ndinga.

⁶⁹ Ntangu yayi, kana Wesley tulaka ve na zulu ya Ndinga mpe kuzwaka nkumbu ya yimbi na manima ya yandi, ba vwandaka bokila yandi muntu ya kulawuka, mpe nyonso yankaka, yandi zolaka ata mbala mosi ve kuvwanda na lenda ya kusala. Kasi Wesley vwandaka mosi ya ba-scientifiques ya nene ya Nzambi. Luther vwandaka mosi ya ba-scientifique ya nene ya Nzambi. Ba vwandaka kipe ve yina mabuundu vwandaka tuba, yina ba-organisation tubaka. Luther kipeke ve yina ba-Catholique

tubaka, yandi kwikilaka ti ya ke zinga na nzila ya lukwikilu! Alleluia! Mpe yandi bakaka ba-élément chimique ya Ndinga ya Nzambi mpe tulaka yawu kintwadi, mpe dibuundu vwandaka tambula na nzila ya lukwikilu. Wesley tulaka yawu kintwadi na nzila ya Menga, mpe siamisaka yawu na nzila ya Menga, mpe dibuundu kumaka ya kusantisama. Ba-Pentecotiste kwikilaka ti mbotika ya Mpeve-Santu, ti nsilulu keke samu na beno mpe bana ya beno mpe bayina keke ntama, mpe ba me tula ba-produit chimique kintwadi na Ndinga, mpe ba me kota na mupepe. Alleluia! Bawu basikaka, samu ti bawu vwandaka na kiyeka ya kulungisa yawu.

⁷⁰ Ntangu yayi, samu na yinki bantu yayi salaka yayi? Samu na yinki Luther monaka yawu? Samu na yinki Wesley monaka yawu? Samu na yinki bayankaka yayi? Samu bisadilu vwandaka awa na zulu ya ntoto yina lendaka kusala Ford model-T. Ya vwandaka na lotiliki yina lendaka sala tomabilu samu na kukima mbangu. Ya vwandaka na lusanse na kati ya ntoto, ya vwandaka na ba-piston mpe nionso, bamekaniki nionso, carbone samu na générateur, mpe nyonso yina ba zolaka sadila kima yayi, mpe beno tala ya bandaka . . . kusala yawu, mu zolaka tuba, ve kuvanga yawu. Nzambi keke Mvangi, Yandi vwandaka na yawu awa. Kasi muntu yina kwikilaka yawu na mutindu ya science, ya kimuntu, yina ba fiongoninaka na kati ya yawu, mpe bawu zolaka ve kubaka “ve” samu na mvutu. Bawu kwikilaka yawu. Ya vwandaka luzayikisu na kati ya ntima ya bawu, mpe bawu bikana na yawu tii bawu siamisaka ti ya vwandaka kieleka.

⁷¹ Ya keke mutindu yina John Wesley siamisaka kusantisama. Kisadilu vwandaka ya kutula awa, Ndinga ya Nzambi yina nataka yawu. Yandi kwikilaka yawu! Ya lenda vwnda ti kana dibuundu ya muvimba, dibuundu ya ba-Anglican mpe nyonso kumangaka yandi, yandi bikanaka na kundima ya yandi mpe yandi siamisaka yawu. Mpe ba-Pentecotiste kwisaka mpe siamisaka, samu ba vwandaka na bisadilu, ti Mpeve-Santu vwandaka ya kieleka. Mpe bawu zangukaka na mupepe.

⁷² Beno me mona ti, mosi—mosi ya bisalu yayi ya science vwandaka kubwela na yina yankaka, ya vwandaka kubwela na yina yankaka. Ya vwandaka kaka mutindu ya kulutula zulu. Beno me mona? Tomabilu vwandaka kifwani ya kulutula nene na mpunda, mpe mpepo vwandaka mutindu ya zulu mingi ya transport kulutula tomabilu, kasi ya vwandaka bwela na yina yankaka. Ngolo ya mpunda! Amen! Kana yina keke ngolo ya mpunda, yinki samu na ngolo ya Nzambi? Yinki samu na Mpeve-Santu mpe ngolo? Ngolo ya Mpeve-Santu yina lenda nungisa beno, ngolo ya Mpeve-Santu mosi lenda santisa beno. Ngolo mosi ya Mpeve-Santu yina ke santisaka beno, lenda fulusa beno na Mvwandulu ya Yandi. Mpe mwa science, yina zabaka ve ABC ya bawu, monaka yawu. Samu na yinki? Ba vwandaka bantu ya mayeje ya kimpeve. Amen. Bawu monaka kima yango, bawu

kwikilaka yawu. Muntu salaka yawu na nzila ya ndongosolo, muntu ya science. Muntu ya science ya kimpeve salaka yawu na nzila ya luzayikisu. Mosi na nzila ya ndongosolo, yankaka na nzila ya luzayikisu. Oh, kana beto lenda kaka kuzibula. Ya kele na mitindu nyonso ya bisadilu yina kele awa. Ya kele kieleka.

⁷³ Ntangu yayi beto ke tala mutindu ya ke kwenda, mutindu Nzambi vwandaka na lenda ya kusala yawu. Na ba-Pentecotiste, yina zangukaka na mipepe. Mutindu bawu. . . Na manima me vutuka na dibuundu, na kubeluka, na kuzonzaka na bandinga, luzayikisu, makabu ya Mpeve. Ti, Luther zabaka kima mosi ve samu na yawu, to dyaka Wesley salaka. Ata mbala mosi ve ti bawu longaka yawu, bawu zabaka kima na zulu ya yawu. Ya vwandaka na ngaanda ya nsungi ya bawu.

⁷⁴ Na yina, yinki Henry Ford zolaka zaba samu na yina me tala mpepo na bilumbu yayi na ntwala ya Wright Brothers? Beno me mona, bawu zolaka zaba yawu ve. Na manima kima mutindu mosi yina muntu na ntangu yina kuna ba vwandaka nata ditoma ya mpunda, bamvula bankama tanu me luta, lendaka zaba ve kima mosi samu na yina me tala ditoma kukondwa bampunda, kaka ti Biblia zabisaka ti ya ke vwanda kuna. Na yawu bawu vwandaka na lenda ya kusala yawu na nzila ya kusosa ya science. Mpe ntangu ya salamaka na zulu ya ntoto, Nzambi talisaka yawu na kisalu na nzila ya Dibundu ya Yandi. “Samu na bima yina kele, ke monika, ba salaka bima yina ke monikaka ve.” Beno me mona, kifwani ya yawu.

⁷⁵ Ntangu yayi, ntangu yayi nsungi ya Pentecote, bamvula makumi tanu me luta, me fidisa reveil na yinza ya muvimba, na bima ya mutindu na mutindu na kati ya yawu. Mpe bawu kuzwaka bakubeluka, mpe bimbevo belukaka, bikata belukaka, bampofo kuzwaka diaka kumona ya bawu. Beno ke banza ti yinza kwikilaka yawu? Ve, tata. Bawu kwikilaka Luther ve. Bawu kwikilaka Wesley ve. Bawu kwikilaka ve na ba-Pentecotiste. Kasi Nzambi bakaka Biblia, na kusosa-sosa ya yandi, muntu yina vwandaka zola kusala yawu, bakaka Biblia mpe siamisaka na yawu ti Yawu vwandaka kieleka. Amen. Ntangu yayi beto fwana bambuka moyo na yawu, beto fwana kwikila yawu, na kumonaka bima yango vwandaka kifwanukusu. Ntangu yayi beto me zinga nsungi ya Pentecote. Nsungi ya ba-Pentecotiste, mutindu mu me siamisaka kuna, ke kota na nsungi ya Laodicée.

⁷⁶ Kasi ntangu yayi kima yankaka me salama. Beto kele na astronaute ntangu yayi. John Grorde vwandaka ba-astronaute ya beto ya ntete. Mpe beto ke mona ti ya kele ntama mingi na zulu ya mpepo, mpepo lenda kwenda kaka ntama na ngolo ya yawu mpe nyonso yina. Kasi yayi kele na nzila ya ngolo ya atomique, ngolo ya kulutila nene yina ke pusa yandi na zulu mingi kulutila mpepo, mpepo mpe—mpe kele ve na kati ya yawu. Ya kele kieleka. Yandi vwandaka na lenda ya kusala yawu.

Mbote mingi. Ntangu yayi beto kele na astronaute, nsungi ya kimuntu.

⁷⁷ Mpe, beno bambuka moyo, munati-nsangu ke kuma na nsuka ya nsangu ya ntama, ntangu nionso. Beto me siamisa yawu kuna. Ntangu yayi beto kele na ndilulu ya ngudi. Amen mpe amen! Nzambi me . . .

⁷⁸ Science vwandaka na lenda ya kusiamisa ti ya kele na astronaute yina lenda kwenda ntama mingi ve tii kuna beno lendaka ve kumona yawu na meso ya beno ya kimuntu, mpe ya lendaka kwenda kana ya kele na ngolo kuna to ve. Yandi lendaka landila kaka na kukwenda samu yandi vwandaka na kati ya cabine ya mupepe, mpe yandi lendaka mata kuna na zulu mpe kutandama na kuna mpe ke tala bayinza yina kele kuna. Astronaute! Oh, la la, wapi nsungi yina ke na kwiza. Yinga, tata, kwenda na zulu ya bima nionso ya yinza, mpe tandama kuna na kati ya mipepe.

⁷⁹ Yinki ya ke talisa? Nsungi ya kimpeve, ntangu ya kimpeve kisika Nzambi ke kuzwa ba-astronaute ya kimpeve. Amen! Bawu kele awa na ntangu yayi! Alleluia! Bangongoni ya mipepe yina lendaka kwenda kuna na zulu ya ndeke yankaka nionso, ke zyeta na zulu ya bima nionso, ba-astronaute ya kimpeve (Nkembo!) yina lenda baka Ndinga ya Nzambi mpe kusiamisa ti Yandi kele mutindu mosi mazono, bubu yayi, mpe kukonda nsuka. Astronaute ya kimpeve! Oh, la la! Nkembo! Yina ke sala munu kuwa mbote, kuzinga na nsungi yayi! Ntangu yayi wapi kima ya kitoko samu na astronaute ya kimpeve! Beno me mona? Yinki ya kele? Yinki bantu ya science salaka? Ba vwandaka na lenda ya kusala yawu. Mpe Nzambi, na nzila ya muntu yina ke vwanda na Biblia mpe ke tuba ti “Yandi kele mutindu mosi mazono, bubu yayi, mpe kukonda nsuka,” mpe kukondwa boma ya nsilulu ata nyonso yina muntu mosi tubaka, beno bikana na yawu. Yinki ya kele? Beno me kuma na astronaute yina lenda kwenda ntama mingi ve ya kele na zulu ya mabanza ya denomination. Ya kele na zulu ya nyonso yankaka. Ya kele na zulu ya bima ya dibuundu. Ya kele nyonso kuna na Nzambi mpe na Yandi mosi kaka beno ke bikana. Ba-astronaute!

⁸⁰ Mpe, beno bambuka, samu kaka na kuvwanda astronaute, bawu fwana kukota na kati ya cabine, mpe bawu lendaka ve kukiyala bawu mosi. Ya ke lomba ngolo ya radar, ngolo ya atomique samu na kuvumbula yandi na zulu ya ntangu, mpe na manima yandi me twadisama na yinzo-zulu. Nkembo! Ba-astronaute ya Nzambi kele mutindu mosi! Bawu ke kota na cabine, mpe na kisika mosi, na kati ya nzutu, mpe nzutu yina kele Nzutu ya Klisto. Na manima, ya kele bawu ve, ya—ya kele ve, ya vwandaka ve John Glenn, ya vwandaka—ya vwandaka cabine yina yandi vwandaka. Ya vwandaka masini. Yandi vwandaka kaka kuna, yandi salaka kima mosi ve. Yandi vwandaka kaka

na kikesa ya kieleka samu na kumata kuna mpe kutuba “ya kele kieleka,” samu science me siamisa yawu.

⁸¹ Nzambi zola muntu yina lenda kota na Klisto mpe kukwikila ti Yandi kele mutindu mosi mazono, bubu yayi, mpe kukonda nsuka, mpe ba ke baka ve dibanza ya bawu mosi, ba ke kwenda na kati-kati ya mipepe, ba ke twadisa bawu na Mpeve-Santu. Amen. Ba-astronaute! Fiou! Wapi mutindu ya kele ntama na ditoma ya ntama ya mpunda! Wapi mutindu ya kele ntama na mpepo! Wapi mutindu ntama ya kele na kunungisama, kusantisama, mbotika ya Mpeve-Santu! Bawu ke na kwiza na bangononi. Ntete, bawu vwandaka miseleketete, na manima bawu kumaka bansusu, na manima bawu me kuma bangoyi-ngoyi, kasi ntangu yayi bawu kele bangononi. Muntu ve lenda landa bawu!

⁸² Ngononi kele ndeke ya mutindu yankaka. Yandi lenda kwenda na zulu mingi kulutila ndeke nyonso yankaka. Yandi kele ya kuyilama na kumona, kubumba yintu ya yandi kitezo ntangu yandi ke mata kuna. Ya kele na bantu lenda dumuka mpe zaba ve kisika bawu kele na manima bawu me kuma kuna, samu ti yandi lenda ve kumona ntama kulutila yina yandi me dumuka. Kasi ya kele na bayankaka yina lenda tala manima mpe kumona yina ke salama. Ya kele ngononi. Yandi lenda telama kuna tii kuna yandi ke tala yawu, mpe ke vingila tii yandi ke kuwa nsangu yina ke tuba na yandi yinki ya kutuba. Ya kele astronaute ya Nzambi. Beno me mona? Ya ke na kulandaka bisalu nyonso yankaka, samu na yinki ya ke landa ve kisalu yayi?

⁸³ Ba-astronaute samu na Yesu. Amen. Yandi ke pumbukaka ve na ngolo ya yandi mosi. Ba ke losa yandi. Kima mosi kaka yandi ke sala kele kukota na kati ya yawu. Yawu yina kaka beno fwana sala, kele kukota na yawu, Nzambi ke sala kulosa mpe kutula na kisika. Ya kele dyaka ve ngolo ya lusanse, to, credo mosi ya dibuundu. Ya kele ngolo ya atome ya Nzambi yina ke pusa beno na ngolo kuna na mipepe. Amen. Oh! Oh, yinki ya kele, ba-astronaute yayi? Bawu kuzwaka . . . Bawu kuzwaka ata fioti ve mpova yayi *kunungisama*, kaka mpova yayi *kusantisama*, yandi me kota na Biblia ya muvimba. Amen. Yandi me kota na nyonso yina, samu ti yandi zaba ti Nzambi kele na lenda ya kusala konso nsilulu yina Yandi salaka. Yandi kele kaka ya kuvwanda kuna mpe ke vingila. Oh, la la! Ndinga kele ya kukangama na Yawu mosi. Kana beno kele ya kubela, mpe astronaute, beno bambuka kaka moyo, beno kota na Klisto, beno vingila kutanga ya manima-nima. Yimeni. Yandi ke bula disasi, beno vwanda na boma ve. Ntangu yayi, yandi vwandaka na lenda ya kusala yawu samu ti Nzambi silaka yawu.

⁸⁴ Ntangu yayi, wapi mutindu ya kulutila nene kele astronaute, bima yayi ntangu yayi, na ngolo ya ntama ya bampunda, ngolo ya tomabilu, mpe—mpe na mpepo! Beno me mona, astronaute, yandi kele ya zulu mingi ti yandi lenda mona bima yina muntu

na kati ya mpunda lendaka ve kumona. Yandi kele na zulu mingi ti yandi lenda mona bima yina muntu na tomabilu lendaka mona ve. Yandi kele na zulu mingi ti yandi lenda mona bima yina muntu ke pumbuka lenda mona ve. Yandi me basika na kikuma. Amen. Nkembo! Yawu yina. Yandi me kwenda ntama ya kisalu nionso yina muntu lendaka banza, organisation, denomination, “Beno fwana vwanda ba-Methodiste, ba-Baptiste, to ya *yayi*, ba-unitaire, ba-binitaire,” to nionso yina ya kele. Yandi kele astronaute, ba me kanga yandi na kati-kati. Amen. Wapi mutindu mu ke vutula matondo!

⁸⁵ Mpe, beno bambuka moyo, ba-astronaute me twadisama na ngolo ya radar. Beno me mona bawu ke nata John Groughes. Mu talaka kuna na Cap Canaveral mpe mu monaka kima yina ya nene ya radar, mpe beno lendaka mona yandi kisika mosi ve, kasi beno lendaka tuba kisika yandi vwandaka na nzila yina radar vwandaka talisa. Ya kele kisika yina yandi vwandaka. Beno me mona? Mpe beto kele na radar, mpe, bisambu. Kisambu kele ngolo ya radar yina ke twadisaka ba-astronaute. “Beno lomba Tata kima nyonso yina na Nkumbu ya Munu, Mu ke sala yawu.” Beno me mona? Beno tala kaka mbote mutindu kisambu ke kwenda, beno lenda mona mutindu yandi ke lakisa. Amen. Beno tala kaka mbote mutindu dibuundu ke na kusambilaka, beno lenda mona mutindu ba-missile ke pumbuka. Beno lenda tuba yawu na nzila ya ba-astronaute ke tambulaka, na nzila ya dibuundu ke sambila.

⁸⁶ Yandi ke sambila, “Mfumumu, ya kieleka beto ke kwikilaka ve na bima yayi.” Uh-oh! Ba-astronaute yina ke na kukulumuka. Yimeni. Oh, mpangi!

⁸⁷ Kasi ntangu bima nionso ke salama, “Mfumumu, mwangisa Mpeve ya Nge na zulu ya dibuundu mpe pesa yawu yina beto ke na yawu nsatu. Mwangisa na zulu ya beto Mpeve-Santu, mpe basisa beto kaka na mabanza nionso, mpe kukwikila ti Ndinga yango kele kieleka mpe beto ke telama kaka pene-pene ya Yawu.” Beno tala mbote kitala-tala na manima ke banda na kutelemisa yintu ya yawu mutindu yayi, beno me mona. Ba-astronaute ke landila mpe ke landila mutindu yina, kuna na zulu na kati ya mipepe. Hum! Kitoko mingi! Ke kwenda ntama na denomination nionso, ke kwenda ntama na credo nionso.

⁸⁸ Ntangu yayi beno bambuka moyo, kunungisama me pesama mutindu credo, ya kele kieleka, beno ke kwikilaka kunungisama mutindu kisika mosi mutindu ba-Luthérien mpe ba-satellites yankaka ya bawu. Ya kele yina bawu kele, ba-satellite, kasi yina me katuka ntete ve na zulu ya ntoto. Beno baka kusantisama mpe ba-satellite ya bawu. Beno tuba, “Yinki kele ba-satellite ya ba-Luthérien?” Mbote, Dibundu ya Klisto mpe nkonga yina kuna. “Yinki kele ba-satellite ya bantu ya Wesley, na ba-Méthodiste mutindu yina?” Ba-Nazaréen, ba-Pèlerin de la sainteté, ba-satellite ya bawu. Mpe kuna ba-Pentecotiste mpe ba-satellite ya

bawu, mpepo, kieleka, ba-unitaire, ba-binitaire, ba-trinitaire, ba-quartenaire, bayayi nionso na yankaka, ba-Foursquare, Dibuundu ya Nzambi, nionso diaka kuna ya kufuluka na credo na kati ya denomination.

⁸⁹ Kasi ba-astronaute ke bukaka kibaka. Yandi ke kwenda kaka na ntwala. Yandi ke kuwa kima mosi ve. Oh, la la! Yandi ke kwenda kaka ntama na nyonso ya yawu. Beno me mona, yandi kele kuna kisika bima nyonso. . . Yandi ke na kuzinga na Mvwandulu ya Nzambi. Yinga, tata. Yandi silaka yawu, Ndinga ya Yandi ke tuba ti Yandi kele Nganga-Nzambi ya Ntete. Beno me mona radar yina ya nene ya kuvwanda kuna ke tambula? Beno tala Yandi mbote na lukutakanu. Beno lenda tala mbote ntangu Mpeve-Santu ke kulumuka na mutindu ya Dikunzi ya Tiya mutindu Yandi silaka. Muntu ke vwanda ve kuna ke meka na kubanza Yawu na science, mukwikidi ya kieleka. Yinki Yandi kele? Yandi kele Kitala-tala ya Radar. Beno tala mbote Yandi. Yandi ke banda na kulakisa bisika nyonso. Amen. Mpe ya ke simba yina kuna, astronaute yina. “Nge kele na cancer. Nge kele na *yayi-mpe-yayi*. Nge kele *Kingandi* na kisika mosi. Mfumu Yesu me belusa nge.” Alleluia! Yandi ke kwenda. Ba-astronaute! Oh, la la, yinki Dibuundu Ya zolaka vwanda! Ya kele awa.

⁹⁰ Ba me siamisa bisalu na nzila ya science. Ba lakisaka yawu kuna na Kutalisama ya bima ya Yinza ya muvimba. Beto kele na yawu. Amen. Ya me siamisama bisika nionso, beto ke na kuzingak na nsungi ya astronaute. Beno me mona, “Ya vwandaka ya kusala na bima yina ke monikaka ve.” Beno me mona, ya salamaka na kima mosi na Mazulu. Ya kele Nzambi Yandi mosi; beno kele na kitezo yina ya sambanu. Ya kele ngolo ya Nzambi. Beto me vwanda na kisika ya mutindu yina tii ba me zangula beto na kitezo yina, na zulu ya kima yayi ya kukwenda na ntoni mpe kudila, kima yayi ya kutulaka crepe na diboko ya mwelo mpe kutuba mbote ya nsuka. Alleluia! Beto me kota ntangu yayi na kati ya astronaute, mpe beto me kwenda kuna mpe beto me mona kisika ya kele, mpe ya me vutuka. Nkembo! Beto ke kwenda na Yinzo na zulu kuna, na manima ya mabanza ya muntu. Wapi mutindu kiboba ke soba na mbala mosi na mbwetolo ya disu. Beto ke mona bawu kuna, biboba ya babakala mpe bakento, bantwenia diaka. “Wapi mutindu beno ke zaba?” Biblia ke longaka yawu! Mpe, Nzambi tindaka astronaute mosi kuna na zulu, beto zaba nionso yina ya kele, yandi me kwisa vutuka. Ya kele ve na boma samu na kufwa. Kufwa kele kima mosi ve. Kieleka, ya ke na kuzinga. Yinga, tata. Ya ke katula kaka makulu ya nge na ntoto samu beto kwenda. Oh, mutindu ya kele mbote mingi!

⁹¹ Yandi silaka bima nyonso yayi na kati ya Ndinga ya Yandi, samu na Hébreux 13:8 ke tuba, “Yandi kele mutindu mosi mazono, bubu yayi, mpe kukonda nsuka.” Bima yina Yandi vwandaka na lenda, Nzambi lendaka sala na nzila ya muntu

mosi yina lendaka kukipesa yandi mosi na yawu, na Ndinga ya Nzambi, samu ti, mutindu mu tubaka mazono na nkokila, yandi telemaka ntangu nyonso na Ndinga.

⁹² Ntangu yayi, beno zaba yinki, ba-astronaute kele kima ya malu-malu ve. Yinki samu na yina me tala Elie? Kana yandi vwandaka ve astronaute, mu me monaka ata fioti ve mosi. Yandi kwendaka kisika John Glenn banzaka ata fioti ve na kukwenda.

⁹³ Mbote, beno zaba, bawu kuzwaka mosi yina lemukaka malembe na ntangu mosi. Nkumbu ya yandi vwandaka Enoch. Yandi landilaka kaka na kukwenda, kasi yandi vwandaka astronaute. Kieleka. Yandi vwandaka na cabine ya mupepe, yandi zolaka soba ve, kima mosi ve. Ve, yandi vwandaka yimeni ya kufuluka na mupepe ntangu yandi bandaka na kutambula. Yandi landilaka kaka na kukwenda na kubikaka bitezo nionso mpe nionso, kwendaka kuna na kati ya Mvwandulu ya Nzambi.

⁹⁴ Mpe na yina kiboba mosi ya bakala vwandaka ya kulemba mpe lendaka tambula diaka mbote ve. Yandi swanaka na Jézabel, mpe bansuki ya yandi ya nkufi mpe ya kupakula mpe nionso yina, tii kuna Nzambi fidisaka kaka kipusu, yandi tubaka, “Mu ke bika nge kumata na kati ya matuti na manima ya midi yayi.” Astronaute!

⁹⁵ Kilumbu mosi Mosi kwisaka kufwa samu na beto nionso, mpe Nzambi vumbulaka Yandi na lufwa na kilumbu ya tatu. Mpe bankama tanu ya bantu telemaka kuna mpe monaka ti ba zangulaka Yandi na matuti, na Ndinga tubaka, “Mu ke kwisa diaka.” Mpe Bawanzio vutukaka mpe tubaka, “Yesu mosi yayi yina ba zangulaka, Mfumu Astronaute, ke vutuka dyaka mutindu mosi, na mutindu mosi ya kukabuka yina Yandi kele na kati, nzutu, yina ke kufwaka ve.” Alleluia! “Mpe beto ke kuzwa nzutu mutindu nzutu ya Yandi Mosi ya nkembo, samu ti beto ke mona Yandi mutindu Yandi kele.” Oh, alleluia! Yandi bukaka bibaka nionso ya muningu, bikaka ya mabanza nionso, mpe kwendaka na zulu ya mabanza, kwendaka na zulu ya nionso yankaka.

⁹⁶ Mpe muntu nyonso yina ke zingaka ntete samu na Nzambi fwana kwenda ntama na ba-sense nyonso tanu, yandi fwana landila ndongosolo nyonso, kisalu nyonso yina muntu lenda sala, mpe kukwikila Nzambi, ke buka nyonso mpe ke tula yawu na lweka, mpe ke zanguka na Mazulu. Amen. Oh, yina ba-astronaute mpe nionso me sala na kimuntu, Nzambi ke vwanda na lenda ya kusala yawu na nzila ya dibuundu ya Yandi, na nzila ya kimpeve, na nzila ya bantu ya kimpeve yina ke kwikila. Bakala nyonso to kento yina ke meka na ntangu mosi, ntangu nyonso samu na kubaka Nzambi na Ndinga ya Yandi, ya kele astronaute.

⁹⁷ Bawu ke tuba, “Oh, yina kele mbote ve. Beno kuwa bantu yina ke dila, ke boka, ke kuwa yayi? Oh, yina kele ve ya kulunga.”

Yina bawu ke bakula ve.

⁹⁸ Muntu mosi tubaka na munu, yandi tubaka, “Nge kuzwaka ndosi, Mpangi Branham, ntangu nge monaka kisika yina.” Mu kuzwaka ata fioti ve ndosi. Mu vwandaka ya kutelama kuna vwandaka tala na yisi kisika mu vwandaka ya kulala na zulu ya mbeto. Mu banza ti mu vwandaka lotta na zulu ya mbeto, kasi mu vwandaka na zulu awa ke tala munu mosi. Beno me mona? Oh, Yandi pesaka munu mwa astronaute mosi yina ke ke twadisa munu na suka yina, ke talisa munu kisika ya kukwenda. Mpe ya ke lakisa ti radar ya beno ke lakisa yawu, kieleka kisika ya kele. Ntangu yayi, ya kele munu ve, ya kele Yandi. Ya kele mpeve ya beno na kati ya beno ke kwikila Nsangu yina, mpe ya kele Mpeve-Santu yina kele ya kutelama awa kisika mu kele, mpe beno ke kwikila yawu mutindu yina mpe yawu ke kota na ngwisani; mpe yawu yayi me vutuka kaka, mvutu ya beno. Astronaute! Amen. Oh, wapi kitoko ya kele! Yinga, tata.

⁹⁹ Nene, science me sala kima ya nene. Mpe, beno zaba, bawu me sala yawu nene mingi tii bawu ke kuzwa boma ya bawu mosi. Ya kele kieleka. Bawu kele na bunene mingi ti bawu ke kuzwa boma ya bawu mosi. Beno zaba, bawu tubaka awa pene ya bamvula zole me luta, ya vwandaka “baminuti tatu me bikana na ntuala ya kati-kati ya mpimpa.” Bawu ke tala boma. Yinki bawu ke na kusalaka? Ntangu yayi, muntu vwandaka na lenda, na manima domaine ya kimuntu ya yandi na kati ya astronaute ya kimuntu, ntangu yayi yandi vwandaka na lenda ya kusala astronaute yayi. Mpe yandi ke banza ntangu yayi ti ntangu Russie ke banda na kumwangisa yinsi yayi, to yinsi yankaka, yandi ke kwenda kuzyeta kuna na ngonda.

¹⁰⁰ Mu monaka mwa kima mosi ya kulutila kitoko kilumbu yina, ya vwandaka kitoko mingi. Ya vwandaka na ba-Indien zole ya bantwenya ya kutelama, ke solula mosi na yankaka, na mwa kivumu ya nene, beno zaba, mutindu yayi, mpe dinsala yina vwandaka luta na zulu ya yintu ya bawu, ba vwandaka pesana mbote, vwandaka pesana mukongo mosi na yankaka. Yandi tubaka, “Mpangi-bakala, beto ke vutuka ntama mingi ve na yinsi, mundele ke kwenda na ngonda.” Yandi tubaka, “Beto ke vwanda diaka na yinsi ya beto. Mundele ke kwenda na ngonda, na yina beto ke vwanda diaka na yinsi ya beto.” Ya kele mbote mingi.

¹⁰¹ Oh, ntangu yayi bawu nyonso ke zola kusala mingi ya ba-capsule spatiale yayi samu ti bawu kota na kati ya yawu. Mpe nsungi ya atomique ke kwiza, ba ke mwangisa yinza, ba ke benda kaka *yayi* mpe nyonso ke kwenda na ngonda, na kusalaka nzietolo na ngonda, mpe ba ke sukisa nionso yayi, mpe na yina ba ke sala kaka ekonomi yankaka kuna na ngonda. Ba ke kuma kuna ve. Mu ke kwikila ve, na ntima ya munu ya muvimba, ba ke kuma kuna. Beno me mona?

¹⁰² Kasi, na ntangu mosi, mukwikidi ya kieleka na Klisto me kota na ba-Astronaute ya yandi. Amen. “Na nzila ya Mpeve mosi beto nyonso kele ya kubotama na Astronaute mosi.” Oh, Nzutu mosi! Ya lenda vibidila mupepe ya mutindu nionso. Ba mekaka yawu na dibulu ya tiya, ya ke nunga na dibulu ya tiya, na yina ya lendaka ve kuyokama; bambala sambwadi ba yangulaka yawu na tiya. Ba mekaka yawu na nyonso, ya basikaka mbote mingi. Na yina ba-scientifique ya kimpeve vwandaka na lenda ya kusiamisa ti bawu lendaka kuvidila nionso. Na yawu mukwikidi ya kieleka ya kimpeve me vukana yandi mosi mpe me kota na Astronaute ya Nzambi, Klisto, na kukwikilaka bima nyonso; na kutulaka ba-credo ya yandi, ba-credo ya ba-Pentecotiste, ba-credo ya ba-Baptiste, ba-credo ya ba-Methodiste. Yandi me kota kaka na ba-Astronaute, na kutubaka, “Mfumu, wapi ntangu ya me kubama?” Oh, la la! Yinki yandi ke na kusalaka? Yandi ke na kwiza na mwa balukutakanu, yandi ke na kuwa kutanga ya manima-nima ya Ndinga ya Nzambi.

¹⁰³ Beno zaba, ntangu John Glenn vwandaka me vwanda kuna na suka yina, ba vwanda kuwa kutanga ya manima-nima. “Kumi, yivwa, nana, sambwadi, sambanu, tanu, yiya, tatu, zole, mosi, zero.” Beno me mona? Mpe ntangu yayi yandi fwana kuma na kisika yina ya ke tuba, “Ya kele baminuti tatu tii kima mosi ke banda.” Bawu zaba ve yinki ya kele. “Baminuti tatu tii beto ke kuzwa ngunga ya zero.”

¹⁰⁴ Ntangu yayi beno tala, mukwikidi ya kieleka kele na kati ya Klisto. Ata kitumbu samu na bayina kele na kati ya Klisto. Longa Ndinga, bikana kaka na Ndinga. Mu ke kipe ve yina ba-denomination ke tuba, ba ke kwikila Yawu. Ba ke telama kaka kuna, samu ti ya kele Ndinga. Bantu ya denomination ke sala kinkuku ya bima mpe ke basisa bawu na ngaanda, ke basisa bawu na ngaanda, mpe kutuba “bawu kele bilawu,” nyonso mutindu yina. Kasi bawu ke bikana ya kukangama na Ndinga yina. Ntangu nyonso yina Nzambi silaka yawu, bawu ke vwanda kuna samu ti bawu kele ba-astronaute. Bawu ke kwikila Ndinga. Mpe ya kele ve na mutindu ya kukatukila bawu. Ba ke bika beno na mutindu nyonso, na yawu beno bika kaka—kaka bawu swi mwa ntangu fyoti.

¹⁰⁵ Kasi bawu kele na kati kuna, ya kuvwanda na bisika ya Mazulu na kati ya Klisto Yesu, na kuwaka kutanga ya manima-nima, *Bansungi Ya Dibwundu* mpe nionso yina. Nkembo! Ya ke sala ti beno kuwa mbote, mutindu yina ve? Beno kuwa kutanga ya manima-nima! Yinki kele kutanga ya manima-nima? “Bima yayi nionso ba silaka, awa kele kisika yina yawu salamaka. Bima yayi nionso ba silaka, awa kele kisika yawu ke na kusalama. Kisika nsilulu kele, awa kele kisika ya salamaka. Kisalu yina Yandi silaka bubu yayi, yawu yayi kaka na kati-kati ya beto.” Yinki bawu ke na kusalaka? Bawu ke na kuwa kutanga ya manima-nima. Wapi mutindu ntama ya me katuka? Nzila

nyonso na Luther. Kutanga ya manima-nima! “Kunungisama, kusantisama . . . Kumi, yivwa, nana, sambwadi, sambanu, tanu, yiya, tatu, zole . . . Beto mata!” Yinki ba ke na kusalaka? Ba ke na kuingila kukwenda, ngunga ya zero. Amen.

[Mpangi Branham, bangunga nana na manima, kangaka na bande kitini yayi ya nsuka ba me bwela awa mutindu 106-111. Yandi ke tendula yayi na kati ya dilongi ya yandi ya nkokila, *Na Mvwandulu Ya Yandi*, ba-paragraphe 4-5—Mu.]

¹⁰⁶ Ba-orbite yayi ya nene yina Dibuundu me kubama na kusala, mpe ntangu ya nene ya kutanga ya manima-nima, Mu ke zola kutendula na beno yina mu banza ti kutanga ya manima-nima kele. Ntangu yayi, mu banza ti beto me tubila yawu na kati ya dibuundu awa. Mpe ntangu yayi beno tala ti, ntangu ba-astronaute ya kimuntu ke na kukubama samu na kubika ntoto, ya kele na kutanga ya manima-nima yina ke banda na kumi tii na zero. Ntangu yayi, mu mekaka ve na kubuka Nsangu yayi mpe kupesa yawu nsalulu ya kimpeve, mutindu ya ke baka ntangu mingi na suka yayi. Kasi mu zola kumeka kubangula yayi na beno, ti *kumi* kele lutangu ya “mambu ya yinza,” muntu. Kasi *sambwadi* kele lutangu ya “kulunga ya Nzambi.” Bilumbu sambanu Yandi salaka mazulu mpe ntoto, mpe ya sambwadi Yandi pemaka. Mpe bamvula mafunda sambanu yinza ke nwanisa disumu, to dibuundu ke sala kisalu na zulu ya disumu, mpe ya sambwadi kele Millenium, Saba.

¹⁰⁷ Sambwadi kele lutangu ya kulunga ya Nzambi. Mpe ntangu yayi Yandi me pesa beto kutanga ya manima-nima ya kieleka, mpe kutanga ya Yandi ya manima-nima kele ve kumi, kasi sambwadi. Beto me tala kaka yawu na kati ya *Bansungi Sambwadi Ya Dibuundu*. Ntangu yayi beto ke mona, mpe kuna na Apocalypse, kutanga ya ntete ya manima-nima vwandaka nsungi ya ntete. Kutanga ya zole ya manima-nima, nsungi ya zole. Mpe na kutanga ya manima-nima ya sambwadi. Mpe awa beto ke mona pwelele na ntwala ya beto, mutindu kifwanusu mosi me salama, na yina beto me mona kutanga yayi ya manima-nima. Lutangu ya ntete ya kutanga vwandaka Ephèse. Lutangu ya zole ya kutanga vwandaka Smyrne, Smyrne. Na manima Pergame. Thyatire. Ya tanu vwandaka Sardes. Sambanu vwandaka Philadelphie. Mpe sambwadi vwandaka nsungi ya Laodicée, nsungi ya dibuundu ya nsuka. Na manima ya kele ntangu ya zero, samu ti Dibuundu kukwenda, na manima bansungi ya dibuundu me kuma na nsuka ya bawu. Ntangu yayi, beto zaba ti nsungi ya Thyatire me kwiza mpe me kwenda, mpe nsungi ya Ephèse me kwiza mpe me kwenda, nsungi ya Philadelphie me kwiza mpe me kwenda. Mpe beto kele na nsungi ya dibuundu ya sambwadi, na nsuka ya yawu, nsungi ya Laodicée. Mpe yina kele kutanga ya manima-nima.

¹⁰⁸ Kana beno tala na baleso ya beto ya ntwala ya mabuundu, Yandi simbaka na diboko ya Yandi *bambwetete sambwadi*, yina

beto monaka ti ya vwandaka “milongi sambwadi ya bansungi sambwadi ya dibuundu.” Mosi na mosi ya bawu me talisama na mutindu ya kulunga mutindu Nzambi bakaka kutanga ya manima-nima ya Yandi. Kubanda ntangu yina Yandi kwendaka, tii ntangu Yandi ke vutuka, Yandi ke vukana kintwadi bantu samu na luzolo ya Nkumbu ya Yandi. Bandaka na Kilumbu ya Pentecote. Ya ntete, dibuundu ya Ephèse, mbwetete mpe munati-nsangu ya dibuundu yango beto ke kwikila na kuvwanda Santu Paul. Yandi kwisaka, mpe lutangu ya ntete me salama. Nsungi ya dibuundu ya zole, yina kele Smyrne, vwandaka Irénée, santu ya nene ya Nzambi yina twadisaka nsungi ya dibuundu yina na nsuka. Nsungi ya dibuundu ya tatu, yina vwandaka Pergame, vwandaka Santu Colomba yina vwandaka santu ya nene ya Nzambi. Na ntangu ya Nsungi ya Mudidi, na ntangu ya lukwamusu, nsungi ya yiya mpe kutanga ya yiya, Santu Martin ya Tours, santu ya nene katukaka na France. Nsungi ya dibuundu ya tanu, mpe munati-nsangu ya yawu vwandaka Martin Luther na zulu ya kutanga ya manima-nima. Nsungi ya sambanu vwandaka John Wesley na zulu ya kutanga ya manima-nima.

¹⁰⁹ Ntangu yayi beto kele na nsungi ya sambwadi, nsungi ya dibuundu ya Laodicée. Mpe beto ke na kuvingila munati-nsangu yina ya nene ya kumonana ya zole ya Elie, na kutanga ya manima-nima. Mpe kaka na ntangu yina ke monika, na yina ya kele ntangu ya zero mpe Dibundu ke baka nzila ya yawu na Yinzo, ke kwenda na kati ya mipepe, na Mazulu, na zulu ya ngonda, bambwetete, nyonso yankaka, mpe kukutana na Yesu.

¹¹⁰ Wapi kisika yayi me katuka mpe wapi kisika bawu kwendaka? Na Astronaute yayi. Wapi mutindu bantu kotaka na Astronaute na kisika ya ntete? Ya kele mutindu bawu fwana kota na yawu na konso kisika, konso ntangu. Ya kele kieleka. Fwana kota mutindu mosi na mbala ya ntete, samu ti orbite yayi ya nene ya nzutu ya nene ya bantu. Ti na ntangu ya Noé, ya vwandaka kaka na kielo mosi, mpe kielo yina vwandaka kaka kielo ya nkotolo. Nionso yina vwandaka kota kuna, ata ti bawu me kwenda na kitezo ya ntete ya kunungisama, kitezo ya zole, to kitezo ya tatu, bawu nionso kotaka na kielo mosi. Bawu nionso kwisaka mutindu mosi.

¹¹¹ Mpe ya kele kima mutindu mosi na kilumbu yayi ya astronoute. Beto fwana kota mutindu mosi, kukwiza na nzila ya mutindu mosi, na nzila ya Nsangu mosi, na nzila ya Klisto mosi, na nzila ya Ngolo mosi yina bawu kuzwaka na Kilumbu ya Pantekote. Mutindu mosi! Ya vwandaka ntangu nyonso Mosi, samu ti Yawu kele Kyelo mosi. Mpe wapi mutindu beto ke kota na kati ya nzutu yayi? Na Kielo. Mpe Yesu kele Kielo ya Nzutu yayi. Na yawu beto me kota mpe me butuka na kati ya Kimfumu ya Nzambi, na kati ya Kielo, Yesu Klisto. Mpe ntangu yayi Kielo me kuma pene-pene na nsuka ya Laodicée, na kutanga ya manima-

nima ya nsuka, mpe Dibuundu ke na kukubamaka na kubaka orbite ya yawu na zulu ya balukwamusu nyonso, bima nyonso, mpe ya ke mata mbangu na mazulu ya Mazulu, Dibuundu yina ba me zangula na ntulu ya Nzambi. Amen. [Kisika ya mpamba na bande—Mu.] Amen.

¹¹² Na suka yina ntangu Jean . . . kisika yayi ba bokilaka Glenn dumukaka kuna, muntu nyonso vwandaka na bizizi ya bawu, vwandaka dila mpe vwandaka sambila, vwandaka kukiyufula yina yandi zolaka vwanda na lenda ya kusala. Mpe kima ya ntete, tiya bandaka na kutiamuna ba-atome yango na yina missile yayi ya nene zangukaka kuna na Cape Canaveral, ti yandi mataka na kati ya mipepe mutindu yayi, mpe bantu vwandaka boka mpe vwandaka dila mpe vwandaka kukiyufula yinki zolaka salama na ba-astronaute yina vwandaka mata.

¹¹³ Oh, kasi Dibuundu, nkembo, yandi ke mwangisa tiya mosi mpe. Amen. Kutanga ya manima-nima ke kwisa! Amen! “Kunungisama, kusantisama, mbotika ya Mpeve-Santu, nsungi ya dibuundu ya Laodicée,” beto me kuma na nsuka! Yesu Klisto mutindu mosi mazono, bubu yayi, mpe kukonda nsuka! Yinki kele dyambu? “Kumi, yivwa, nana, sambwadi, sambanu, tanu, yiya, tatu, zole. . . zero!” Ba ke boka ve, kasi ya ke vwanda na kuyimba mpe ke boka mpe ke kembila Nzambi, mutindu Dibuundu ke baka kukwenda ya yawu ya astronaute na mazulu samu na kuvwanda na Yesu Klisto. Amen.

¹¹⁴ Na nsalulu ya kimuntu, ba me kwenda na ngonda. Na nsalulu ya kimpeve beto ke kwenda na Mazulu. Amen! Ba-astronaute ya kimuntu ke meka na kumona yandi kisika na ngonda. Beto me kuma dezia na kisika mosi na Mazulu ya kukubama. “Na Yinzo ya Tata ya Munu kele na bisika mingi ya kuvwanda. Mu ke kwenda mpe ke yidika kisika samu na nge, mpe mu ke vutula Astronaute samu na kubaka nge.” Kutanga ya manima-nima! Beno ke kwikila yawu? Amen. Kutanga ya manima-nima! “Kumi, yivwa, nana, sambwadi, sambanu, tanu, yiya, tatu, zole, mosi, zero!” Tiya bandaka na kumwangana, ba me byadisa ministere na Nkembo. Alleluia! Mpe fusée ya ntama ke banda kukwenda, ve na ngonda, kasi na kutalaka na Nkembo. Yandi yina, tiya ya Nzambi ke na kumwangana. Ngolo ya Mpeve-Santu ke zangula yandi mpe na zulu ya ngonda, bambwetete, na zulu ya nyonso yina ba lendaka sala na nzila ya muntu. Dibuundu ke pumbuka na ntulu ya Nzambi na Mazulu, mosi ya basuka yayi. Bankundi, muntu vwandaka na lenda ya kusala yina bawu kele na yawu na nzila ya bima ya bawu ya kimuntu, mpe Nzambi (mu me siamisa yawu awa) me fwanikisa yawu na kimpeve.

¹¹⁵ Beto kota na ba-Astronaute, na nswalu! Mielo ke kangama na manima ya mwa ntangu fioti. Kutanga ya manima-nima! Science me tuba kutanga ya bawu ya manima-nima kele baminuti tatu. Ya beto lendaka vwanda na ntwala ya yawu, ya lendaka vwanda “mosi” me kubama samu na “zero!” Beto kota.

Beno ke kwikila ti kutanga ya manima-nima me mana? Beto kulumusa bayintu ya beto na mwa ntangu fioti.

¹¹⁶ Tata! “Kumi, yivwa, nana, sambwadi, sambanu, tanu, yiya, tatu, zole...” Nzambi! “Bayinsi ke na kukabwana. Israel ke na kuvumbuka, bidimbu yina baprofete zabisaka na ntwala; ba me tanga bilumbu ya Bantu ya makanda, ba me fuluka na boma; beno vutuka, O nge me zimbana, na bantu ya nge.” Wapi kilumbu! Nsemo ya nkokila ke sema. O Nzambi, beto ke sambila ti konso muntu ya kukondwa lukwikilu ke tula na lweka mabanza ya yandi nionso ya lukolo, mabanza ya yandi nyonso yina kele ya kuswaswana na Ndinga ya Nge, mpe na suka yayi ke kota na Astronaute, samu ti beto me butuka na kati ya Yawu, na kati kuna samu na kukuma kitini ya Astronaute.

¹¹⁷ Mu ke sambila, Tata ya Mazulu, mpe na kati ya Nzutu yayi ya nene ya Klisto, ti Nge ke botika bakwikidi bubu yayi na Mpeve-Santu. Bika ti dilonga ya maza kuvwanda ya kufulukana na bantu na suka yayi, na kufungunaka masumu ya bawu mpe ba zikaka bawu na Nkumbu ya Yesu Klisto, mpe yina ke mata na nzila ya Astronaute ya ntama, Mfumu, yina ke kwenda na zulu ya ngonda mpe bambwetete, mpe ke kwenda na zulu ya ba-credo, ya ba-denomination. Beto me sala kutanga ya manima-nima. Nge tubaka na beto yina ke vwanda, tatu, bitezo tatu yayi ya yayi. Beno me tuba bansungi ya dibuundu, wapi mutindu bawu ke kwenda, nsungi ya dibuundu ya ntete, nsungi ya dibuundu ya zole, nsungi ya dibuundu ya tatu, ya yiya, ya tanu, ya sambanu. Kutanga yayi kele sambwadi. Mpe na manima ya sambwadi, nsungi yayi; beto kele yimeni na kati ya yawu, nsungi ya dibuundu ya nsuka. Mpe ntangu yayi kutanga ya manima-nima kele na kulandila. Bansungi me tangama, nsungi ya Luther, nsungi ya Wesley, nsungi ya Pentecote. Mpe ntangu yayi, Mfumu, ke vukana na ba-Astronaute, na kitala-tala ya nene ya kitoko na ntwala ya Yawu, beto lenda mona Nkembo, kumona Yesu, kumona Yandi na ngolo ya Yandi nyonso, kumona Yandi na bansilulu ya Yandi nyonso. Nyonso yina Yandi silaka ke na kulakisaka na zulu ya beto. Beto ke tonda Nge samu na yayi.

¹¹⁸ Nzambi, bika ti dibuundu bubu yayi kukota na kisika ya lukengolo, samu ti ntama mingi ve ngunga ya zero ke kwisa mpe kielo ya Astronaute ya nene ke kangama, mpepo ya Astronaute. Mpe beto ke kwenda mutindu Noé salaka ntangu yandi kotaka na astronaute ya yandi, mutindu ya vwandaka, ba zangulaka yandi na zulu ya bamasa nionso ya lufundusu. Mpe, Tata, beto zola kota na kati ya Nge ti beto lenda kota na kati ya bayinto ya ntangu, na zulu ya Mars, Jupiter, Venus, na zulu ya Nzila ya Miliki ya Mpembe, mpe ke landila mpe ke landila, kisika ba-astronaute ya kimuntu zaba kima mosi ve. Kasi beto ke mona ti Nge ke bika yandi kusala yawu samu na kidimbu, ti beto lendaka vwanda ya kukubama na kukwenda. Beto ke kwenda

ntama kubanda na ntoto. Pesa yawu, Mfumu. Na Nkumbu ya Yesu Klisto, mu me lomba yawu.

119 Awa keke bamuswale, Mfumu, ya kuvwanda awa, bantu ya kubela yina me fidisa. Ba ke kwikila, Mfumu. Mpe bika ti bawu kuma bantu ya mayele mingi ba-astronaute na suka yayi. Ti ngolo ya Nzambi ya Ngolo nyonso Yina ke lakisa Biblia ya Yandi na zulu ya yayi, ti bawu bakaka na nzutu ya Santu Paul, bamuswale mpe bilele, mpe bambevo mpe bantu ya mpasi belukaka. Bika ti mukwikidi yina ya astronaute, ntangu yina ke simba yandi, katula yandi, Mfumu. Kimbevo na manima! Bika ti konso mbevo awa na ntangu yayi, Mfumu, kukota mbala mosi na Klisto Yesu, na Ndinga ya Yandi, nsilulu ya Yandi. Mpe na kutubaka, “Beno lomba na Tata kima mosi na Nkumbu ya Munu, Mu ke sala yawu.” Bika bawu banda na kutanga, “Kumi, yivwa, nana, sambwadi, sambanu, tanu, yiya, tatu, zole. . . zero. Kwenda, Mfumu!” Bika ti bawu telama na bambeto ya bambevo, na ba-brancard, nionso yina ya lendaka vwanda. Bika ti bawu telama na bimbevo ya bawu yina ke na kukangaka bawu, samu na kukwenda kuna na mipepe kisika science ya badokotolo, mosi ve na kati ya bawu, zaba kima mosi samu na yawu, kisika Ngolo ya Nzambi silaka na nzila ya kusosa ya science ya Biblia awa, to kusosa-sosa ya kimpeve, mu zola tuba, ya Biblia; samu na kulakisa ti Nzambi vwandaka Nzambi, keke kaka Nzambi, Yandi ke vwanda ntangu nyonso Nzambi, mpe Yandi keke ya Seko, ya Ngolo nyonso, ya Ngolo nyonso, Yandi Yina keke bisika nyonso yina lenda zitisa Ndinga ya Yandi; mpe lenda sala bima nyonso, mpe silaka beto nyonso lenda salama na bayina ke kwikila. Nzambi, pesa yawu.

120 Bika ti bakala yina to bakento, mwana-bakala to mwana-kento, na suka yayi, yina keke ve na kati kuna ke kuwa kutanga ya manima-nima ya Ndinga ya Nzambi, na kuzabaka ti beto keke kaka, beto me tanga kima ya nsuka. Yandi me kubama na kuboka “zero” na konso ntangu yina, mpe dibuundu ke kwenda. Beto ke mona Nsangu kumanisa. Beto ke mona lukwamusu ke na kumataka, mutindu beto zonzilaka mazono na nkokila. Beto zaba ti ntangu me kuma pene-pene. Kutanga ya manima-nima me suka. Nge me sadisa beto awa na estrade samu na kulonga bansungi ya dibuundu, mpe kubaka nyonso yankaka mpe kusiamisa yawu, ti kaka ntangu yayi na konso ntangu yina ya lenda salama. Nzambi ya Ngolo nyonso, Yina vangaka Mazulu mpe ntoto, fidisa mawa ya Nge na zulu ya bantu mpe kupesa bawu yina Nge ke na yawu samu na bawu. Samu beto me lomba yawu na Nkumbu ya Yesu.

121 Mpe konso bakala mpe kento na bayintu ya bawu ya kukulumusa. Kana ya keke na bayankaka awa yina zaba Klisto ve mutindu Mvulusi ya bawu na suka yayi, mpe ke zola kuzaba Yandi mpe kukota na mutindu ya Astronaute ya lemvo ya Nzambi, samu na kukwenda na Enlevement, beno zola

kutelemisa diboko ya beno mpe kutuba, “Mu me kubama, mu zola kukubama samu na Enlevement, Mpangi Branham. Sambila samu na munu.” Nzambi sakumuna nge. Nzambi sakumuna nge, nge. Nzambi sakumuna nge, mpe nge. Na ngaanda, na kati, kisika nyonso nge kele, telemisa kaka diboko ya nge. Na yayi, beno tuba, “Nzambi, kotisa munu.” Nzambi sakumuna nge. “Mu zola kuwa kutanga ya manima-nima. Mu zola kuwa yawu. Mu zola kuzaba ti mu kele na lukengolo, ti ntangu ba ke tula tiya mu ke vwanda ve ya kuvwanda na kati ya ditoma ya mpunda. Mu ke vwanda ve na yinzò-Nzambi, na kutambulaka na tomabilu. Mu ke vwanda ve na kati ya mosi yina lenda kaka kukatula makulu ya yandi na ntoto ntangu yayi, yinda mingi samu na kudumuka mpe kuzwa makelele mingi. Mu zola vwanda na kima yina ke nata munu ntama na ngonda mpe bambwetete. Mu zola kuwa kutanga ya manima-nima; credo mosi ve, organisation mosi. Kasi mu zola kuvwanda na kati ya Klisto, kisika mu lenda nata masuwa na zulu ya konso kima yina kele samu na bantu. Mu zola kwenda.”

¹²² Ya kele na yankaka ntete beto sambila? Ya kele . . . ? Nzambi sakumuna nge, ntwenya ya mama. Nzambi sakumuna nge, ntwenya ya bakala. Nzambi sakumuna nge, mpe nge kuna na manima. Mu ke mona diboko ya nge, mpe kieleka Nzambi ke mona yawu. Mpe nge, mpangi ya munu ya bakala, nge mpangi ya bakala. “Mu zola vwanda na kutanga ya manima-nima. Nzambi, bika mu katula kizitu nionso.” Nzambi sakumuna nge, mpangi-bakala. “Mu ke zola kutula na lweka konso disumu. Mu kele na Mpangi Branham ya lembami. Oh, mu lendaka ve kukota na Yawu mutindu yina. Beno sambila Nzambi katula yawu na munu. Mu—mu, Mpangi Branham, mu—mu ke kunwa mwa fyoti. Mu zola ve kusala yawu. Beno sambila ti mu ke tula yawu na lweka. Mu ke kunwaka tabaka. Mu zola ve kusala yawu. Nzambi zaba ti mu zola ve kusala yawu. Kima yango me kanga munu nzila mingi, mu—mu ke sala yawu kaka, mu lenda kwenda ntama na bawu ve. Mu zaba ti ya kele luvunu, mpe mu lendaka sala yawu ve. Mu ke sala yawu ve! Kima yankaka, mu ke tula ntembe na Ndinga. Mu vwanda kukiyufula kaka kana Yawu vwandaka kieleka ya kusungama. Sadisa munu, Nzambi. Bika munu, bika mu bambuka moyo na nionso ya Yawu kele mbote, mpe mu ke kwikila Yawu. Mu zola kuwa kutanga ya manima-nima. Mu zola kisika ntangu nyonso mu ke mona Ndinga ya Nzambi kutuba kima mosi, Mu zola tuba yawu na ‘amen’ mpe kutuba ‘Ya kele Nge, Mfumu.’” Ntangu yayi nionso . . . Nzambi sakumuna nge. Nzambi sakumuna nge, beno nionso.

¹²³ Ya kele na bayankaka awa ntangu yayi yina kele ya kubela, mpe ke tuba, “Mpangi Branham, na suka yayi mu kele Muklisto, kasi mu kele . . . Mu vwandaka . . . mu kuzwaka Mpeve-Santu. Mu me katuka na mpepo ntangu yayi, mu me kubama samu na kutanga ya manima-nima. Mu me basika na ba-denomination

ya mutindu na mutindu mpe nionso yankaka, samu na kuwa kutanga ya manima-nima. Kasi ntangu yayi mu zola tuba kima mosi yayi, Mpangi Branham, na suka yayi, mu kele mbevo. Mu kele na kisalu ya kusala samu na Mfumu. Mu ke na kuwaka kutanga ya manima-nima, kasi mu zola—mu zola beluka. Mu ke kwisa na zulu ya yawu na suka yayi, beno kuwa kutanga ya manima-nima.” Yinki kele kutanga ya manima-nima? Ndinga ya Nzambi. Ba me tanga yawu kaka. Yandi kele mutindu mosi mazono, bubu yayi, mpe kukonda nsuka. “Mu zola kuwa Yandi mutindu Munganga ya munu na suka yayi. Mu zola kutelemisa diboko ya munu mpe kutuba, ‘Sambila samu na munu, Mpangi Branham.’” Nzambi sakumuna nge. Beno kota na kati ntangu yayi. Beno kota. Chaire kele ya kufuluka, mpe na nziunga awa, bantu me fuluka tii na ntoto. Beto lendaka ve kusala ndonga ya bisambu. Ba me telema pene-pene ya bibaka mpe nionso yina. Beto kele kaka na kimvuka mosi. Beto fwana sala yawu ve. Beno kele na kati—beno kele na kati. . . Beno kele astronaute.

¹²⁴ Beno kele astronaute. Beno ke kwenda ntama na Luther. Luther ke kwikilaka yawu nionso ve. Wesley tentikaka maboko. Ba-Pentecotiste ke pakulaka mafuta. Beno kele astronaute, beno me mata na zulu ya mabanza nionso. Kaka samu ti Ndinga tubaka mutindu yina, mu ke landila. Mbote, beno ke tuba, “Luther kwikilaka ve? Ya vwandaka ve Ndinga?” Yinga, kasi Wesley kwendaka na zulu ya yandi. “Mbote, Wesley pakulaka mafuta to kima yankaka. Beno ke kwikila yawu ve?” Yinga, ya kele kieleka. “Ba-pentecotiste basisaka bampeve ya yimbi.” Yinga. “Tentikaka maboko na zulu, yandi vwandaka na kubeluka na maboko mpe nyonso yankaka.” Yinga, mu zaba ti ya kele kieleka, kasi landila. Landila! Wesley ke talaka ve na Luther, Pentecote ke talaka ve na manima na Wesley. To dyaka beto ke tala na Pantekote. Beto kele ba-astronaute. Beto kele na zulu ya yawu. Beto kwenda na ntwala. Klisto tubaka mutindu yina!

¹²⁵ Wapi faso? “Kwiza tentika maboko ya Nge na zulu ya mwana ya munu ya kento mpe yandi ke beluka,” tubaka ba-Juif. Yesu kwendaka mpe salaka yawu samu na yandi, ya kele kieleka. Kasi ntangu ya kumaka ba-Romain, ba-astronaute, yandi tubaka, “Mu kele ve ya kulunga ti Nge kwiza na yisi ya muludi ya munu. Tuba kaka Ndinga, Mfumu.” Mpe Yandi tubaka yawu yimemi. Kaka yina.

¹²⁶ Ntangu yayi beto telemisa bantima ya beto—ya beto na Nzambi. Beto telemisa maboko ya beto na Nzambi, bantima ya beto na Nzambi. Samu ti nyonso yina beno kele na yawu nsatu, mpulusu, kusantisama, mbotika ya Mpeve-Santu, kubeluka ya Kinzambi, nionso yina ya kele, beno telemisa maboko ya beno na zulu mpe beno simba kaka ntima ya beno na Mvwandulu ya Nzambi, mpe beno me bakula ti beno kele ya kuvwanda na bisika ya Mazulu na kati ya Klisto Yesu, mpe beno kele astronaute ya

Lukwikilu yina. Yinki? Awa me kwiza lutangu! “Kumi, yivwa, nana, sambwadi, sambanu, tanu, yiya, tatu, zole. . .” O Yesu, kwiza ntangu yayi! Beto ke tula ngolo ya Nkumbu ya Yandi. Mpe mutindu beto monaka mazono na nkokila, Paul kufwaka muntu meso, ti mosi yankaka kutambula na zulu ya yandi. Mpe beto ke mona ti Yesu lendaka sala nionso yina Yandi—Yandi salaka, bimangu ya mutindu na mutindu, mpe kasi vwandaka kaka na nsuka ya nzila ya Yandi, na kumonaka ba bulaka Yandi mpe losilaka Yandi mate, mpe bima yankaka nionso. Bantu ke bakula yawu ve. Bawu ke bakula ti Nzambi ke salaka yawu samu na kusiamisa ti ya kele kieleka, mpe na manima ke meka lukwikilu ya bantu.

¹²⁷ Mfumu, beto me telama awa mpe me mona ya muvimba mpofo kuzwa kumona ya bawu, kimbevo; ba-cancer yina vwandaka kivudi ya bantu, yina belukaka. Beto me mona bayina vwandaka ya kufwa mpe yina lalaka bangunga na manima ya bangunga, mpe vutukaka dyaka na luzingu. Beto zaba ti ya—ya kele Klisto ya beto ya nene na yina beto kele astronaute na kati ya nzutu ya Yandi. Mpe ntangu yayi kutanga ya manima-nima kele na ntuala, mpe beto ke kwikila na suka yayi samu na kubeluka ya beto, samu na mpulusu ya beto, mpe samu na nyonso yina beto kele na yawu nsatu. Samu ntangu beto ke lomba yawu na Nkumbu ya Yesu Klisto, Yandi silaka, “Beno lomba na Tata ya Munu kima mosi na Nkumbu ya Munu, Mu ke sala yawu.” Mpe yawu yina kaka beto zola sala ntangu yayi kele kubokila Nkumbu ya Yandi, mpe ya fwana salama. Beto ke na kuwa kutanga ya manima-nima.

¹²⁸ Mfumu, bayankaka na kati ya bawu vwandaka bansumuki, me telemisa maboko ya bawu. Ba ke vingila kutanga ya manima-nima, ntangu ya ke vwanda na nsobolo na kati ya ntima ya bawu, yina ke basisa kubeba nionso ya ntama. Mingi ke kunwaka makaya, yina me kubama na kuyambula yawu. Mingi yina me sala bima yina ba lendaka sala ve, mpe ba me kubama samu na kubika yawu, samu ti beto ke lomba Nzambi ya Ngolo nyonso na Nkumbu ya Yesu Klisto samu na kukatula nyonso yina ke kanga Dibuundu na suka yayi, na kimbevo na disumu, mpe ti dibuundu yayi kuvwanda na kimpwanza. Na Nkumbu ya Yesu Klisto, ti ngolo mpe Ngolo ya Nsangu ya mbote ya nene, Tiya ya Mpeve-Santu bandaka na kumwangana, mpe ba-astronaute ya Nzambi ke katula na nsatu ya ntima ya bawu bubu yayi. Pesa yawu, Nzambi ya Ngolo nyonso. Bawu kele ya Nge. Mpe bika bawu kuzwa kubeluka ya bawu, mpulusu ya bawu, mpe nionso yina bawu kele na yawu nsatu. Mu ke pesa bawu na Nge, mpe mu ke pesa bawu na Nge na kisambu ya munu, na autel kisika Menga ya Yesu Klisto kele ya malu-malu na suka yayi. Na Nkumbu ya Yesu Klisto bika bawu kuzwa yina bawu me lomba.


Mpe bantu tubaka, “Amen.” [Dibuundu me tuba, “Amen.”—Mu.]

¹²⁹ Na yawu, beno kwikila Yawu! Ya vwanda mutindu yina! Mu ke kwikila Yawu. Mu ke kwikila. Amen. Mu zaba ti Yandi keke Nzambi. Mu zaba ti beto me kubama samu na kisalu ya nene ya Nzambi. Yinki keke kisalu ya Yandi? Kubika ntoto. Ba-astronaute ke kwenda na ngonda, ntoto yankaka. Mpe Dibuundu ya Nzambi (na mpepo, na zulu ya mpunda mpe nyonso yankaka yina) me bikana mutindu astronaute, samu na yinza yankaka, yina keke Mazulu. Kutanga ya manima-nima, ya keke na zulu. Amen.

Beno zola Yandi? [Dibuundu me tuba, “Amen.”—Mu.] Na yina beto telemisa maboko ya beto mpe beto yimba.

Mu zola Yandi, mu zola Yandi
Samu ti Yandi ntete. . .

Mbote mingi, Mpangi Neville.

Lukumu na Mfumu! Mpe Nzambi sakumuna beno tii na nkokila yayi ntangu mu ke mona beno. 

62-0909M Kutanga Ya Manima-nima
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org